


CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 17 1940

23

T 3222/0.83.2







福建續志卷五十二

塔佛大學漢和  
圖書館珍藏印

孝義三

建寧府

明

鄒伯陽又名文復建安人明初總兵胡廷瑞圍城久不下欲屠之太守翟某募耆德詣師伯陽應命往言詞慷慨廷瑞為動曰姑聽於天封三牌鐵一銅一牙一令探之決曰得鐵屠得銅搜括金帛得牙活伯陽以禱得牙城遂獲全府志

徐日昇字初陽崇安舉人歷安慶郡丞以廉能聞數



視邑篆多德政旋改衢州通水利疏鹽課民有清如水皎如鏡之謠母年七十九溫清孝養者五年母卒卧棺側三載年七十五卒縣志

魏宗欽建安人自幼讀書恒以古人自期父康為斗役虧糧法當死宗欽毅然別妻子詣官請代父罪繫獄歲餘將論決遇赦得免府志

蘓森字公懋浦城人父疾篤刲股為糜以進尋瘥尤精於醫或以疾告輒施以劑凡學官橋梁傾圮即捐貲葺之景泰中輸粟五百石賑饑朝廷旌之府志

馮宣字文昭甌寧人生有膂力走及奔馬正統戊辰

沙尤盜熾取道建之吉陽以截驛路宣與羅佛童范宗南范永清糾集鄉眾奮先攻之斬馘無算驛路遂通知府張瑛征勦高陽餘寇宣隨至大湖嶺遇賊眾駭奔宣手殺數人後無繼者力屈而死府志

趙泰字世亨建陽人宏治間邑令張公津剋鄉賢祠祀先儒劉文簡諸公泰輸田以助歲祀歲大稔作糜食饑者全活甚眾油源三陂堤壞泰完築之又潛水以救旱凡山谿險隘間多建橋亭斃石道以便行旅府志

蔡志仁周日大皆壽寧人嘉靖初流徙聚劫隣邑震



動二人奉檄領兵收捕賊勢猖獗衆皆散遁二人獨當其鋒斬首數十級力屈賊執之不降皆被殺

縣志

李培字汝耘默之子建安人隆慶恩貢事繼母得其歡心撫孤侄若已出親朋不能葬者捐資以助鄉

里重之府志

楊玉崇安人嘉靖十九年歲饑散穀行賑次年饑又賑如前三十四年又饑於六十以上者賑穀伍斗餘者三斗凡三發賑共散穀四千餘石府志

夏福松溪人隆慶間戍福州衛父病篤思見福遣人

通之福聞痛絕禱天割雙肱肉持歸父病瘳兩院

書額旌之府志

葉新魁松溪人五歲喪母祖母鄭氏撫養成人鄭病篤新魁侍奉不離左右求醫無效籲天割股和藥

鄭愈而妻死誓不再娶府志

謝勳字汝賢建安人蚤年喪父流寇突入其家家人盡走勳念孀母在堂挺身捍禦身被重傷母賴不

死又推業以讓兄郡守許天贈旌其門縣志

李廷輔性至孝居建陽水南父歿未葬時洪水暴至平地長一丈水南地濱大溪勢尤洶湧廷輔度父



棺不可徙遂以布纏其棺梁上自上據之與水相  
出沒凡二晝夜水退棺竟獲全府志

陳坊字鍾溪甌寧人孝子榮裔孫萬歷三十七年郡  
大水父柩在家為懸其柩於梁上水大至抱柩不  
忍去與水出沒者連晝夜友愛慷慨族親戚賴其

力縣志

暨日華崇安諸生家火父檢所藏於樓上火迫樓日  
華年十九從火躍入負父出父老雅好琴日華即  
學琴以娛之授徒所得必奉諸親人以稱養志府志

楊遜崇安人業縫衣萬歷四十一年水暴至遜負母

登山妻子俱溺死府志

張其思字得吾浦城人師事鄭應莘應莘廷試京師  
家口悉其思贍給及應莘死燕臺不憚萬里為扶

櫬歸縣志

戴冠字章甫浦城人母病渴嗜甘泉躬汲數里外冬  
泉溫則備梨汁啖之後三年病革父娶繼母繼母  
又病冠懼貽父憂遍求名醫遇異人授以綠橘一  
枚持歸奉母食之立愈縣志

張貞度字惕生建安人從學莆中朱吉林後朱卒貞  
度為扶櫬以歸朱故貧家有六喪未葬貞度哀之



為葬而後回明末由拔貢選雷州府通判以親老不赴子寅恭登進士府志

徐世俊建陽人母患血崩三載不瘳世俊晨夕侍奉未嘗離側母病劇剝胸肉雜藥以進母病卒不起

世俊竭力營喪棺衾之事不以累兄府志

黃懋誠字仲明歐寧諸生值歲歉設粥平糶郡大水

復散粟賑如前一日讀范文正公義田記喟然曰

范公不但忠於國亦自仁於家誠不敏不能如公仁願割已產之半立義莊於是設義學施義棺立

義塚賑貧卹孤皆出於此府志

封字抱赤建寧右衛副千戶之臣饒於

財然性節儉老且死命昇巨簾廳事召諸親友會

曰吾以儉起家與諸君子分甘絕少然吾豈為吝

者哉欲人善用吾財耳今與諸君訣宜各有贈因

開巨簾散千金加封故豪俠甲申國變散父遺財

募義勇從軍婺源死之閣部黃道周為文祭之府志

國朝

鄭國佐字振華建安人幼失怙依兄國卿事母黃氏

盡孝道母嘗病燃臂香哀叩北辰病隨以瘳事兄

友愛甚篤家庭間循循敦禮卽不衣冠不敢見長



者喜讀書見書所載忠孝事津津道以淑家人子  
重時齒穉卽解大人意授孝經必拜而後讀母徐  
氏課學尤嚴雖祖母黃極愛其孫而不廢慈教黃  
卒年八十三順治四年秋七月王祁據郡城荼苦  
百姓國佐挈眷避西鄉以母病無所得藥復入城  
就醫迎徐氏使侍湯藥母以六年終僅僅出喪櫬  
而王師已臨城下賊思突圍國佐憂之語徐曰賊  
欲突圍必焚城城焚則玉石無所分我家世孝義  
今以母故陷圍中此天數也子爲母死孝婦爲夫  
死義綱常大節我兩人全之可以視之如歸矣遂

作血書寘墻隙舉火自焚子重自鄉丞來省詣故  
址得血書媿媿皆忠孝慟哭曰我父母居恒名節  
相勗今果然哀哉重後中順治戊戌進士官刑部  
侍郎弟默維縣令重晉秩光祿大夫贈國佐如其  
官母徐氏贈一品夫人

府志

江梅一梅三梅四梅五者崇安人順治甲午土賊桓  
夢龍肆掠江罵曰今日招兵明日打糧自數年來  
崇之西鄉爲汝害久矣兄弟抽刀殺賊數十人大  
呼曰不爲良民作賊者視此賊衆怒併四兄弟圍  
殺之邑人嘆其義勇

縣志



江日采松溪諸生順治初王師至父兆恒遽出城南日采奉祖母攜妻子從之趨西北嶺師已集郊外兆恒為遊騎所殺日采至地屍慟不已已而師大至遂被害府志

葉盛字德盛松溪人與兄茂俱以奉檄監坑冶自邑徙居遂應場下塘橋巨寇黃其平誘茂盛至將殺之茂度不兩全麾盛速去吾已一丁若未娶存祀檄派可也盛招與同去者三華追一王茂直前曰汝大小只殺一人耳遂遇害盛以木土置枕席於外授三載一日告弟子以故俾切請習友習習習

焚滅殆盡葬茂寶珠山下至今稱義墓云門人為

立祠府志

滕峻字兩華建安貢生事母曾氏承歡無怠所居兵猝至峻負母逃深山宅毀傷不顧曰吾得母無恙足矣叔早逝遺一女峻視若同懷竭其產奩之而一無所私祖居憂旱峻出財倡眾修壩堰流泉源穀歲以稔里有貧而稱貸者悉出券焚之

葉正鑑建陽人族孽葉先鋒素為劇賊窺正鑑之嫂美欲強娶之先殺其父兄先鋒招安來郡城孝子踪跡殺之未便也會漢壽亭侯誕辰正鑑密祝曰



公為明神我為孤子神如相子助我一指力頃之  
先鋒至看劇叢人中正鑑亟取屠刀直入刺之大  
呼曰吾今有以報吾父矣腸胃迸裂血殷流地衆  
擁見知府高攀龍高訊其實實義釋之府志

賴達卿崇安人順治中山寇竊發扶母入山避難寇  
猝至欲殺其母達卿引頸代受刃賊義而釋之已  
而父又被賊掠去隻身入賊巢尋父父縛樹間達  
卿哀慟求釋值前釋母之賊回責其黨曰奈何辱  
孝童遂並得免事父母先意承志親歿營葬廬墓

四年縣冊

袁光朝建陽人竭力事親數十年孺慕如一日厚宗  
族睦鄉鄰年饑捐穀以賑又豁佃民之租施棺掩  
骼修橋通行乾隆間旌縣冊

董睿思崇安人端純有學行寇發劫其父及弟睿思  
冒險入賊營救之以哀泣動賊魁賊釋其父父還  
又設計贖弟歸親柩在堂隣火延及睿思抱柩痛  
哭誓與俱燼火為之返從兄年老厚其養而恤其  
孤孤姪負田糧追呼孔棘代為納之及客死又收  
其骨葬之周急濟貧羣推仁孝縣冊

潘廷雲崇安人天性純篤母目疾幾失明廷雲日跪



神前虔禱久之膝皮爛腐而不知也母因此復明  
兄任懷寧令多官負售業以償廷雲體父志竭蹶  
孝養又周其兄弟宗族之貧者事庶母儼如所生  
仁聲著乎鄉里

縣志

林伯駮建安人明御史有臺曾孫十歲喪父事母全  
氏唯謹遇疾湯藥必嘗而進母老足不能行出入  
躬自背負及卒哀毀骨立立宗祠置祭田戚族之  
貧者厚給之兼理其婚嫁治家嚴整教以義方子  
孫多為諸生循循守禮同里林雲翔事親孝親歿  
廬墓建祠篤於孝友任郵之義與伯駮並稱

縣志

劉學成建安人年十七隨父遷居郡城父遭寇害學  
成負父屍入山林潛避賊平負骸歸葬事母曲盡  
子道母病思梨家去城百二十里學成倉猝奔城  
中覓梨盡一晝夜而歸以奉母母病遂愈外祖黃  
應奇父子遭變相繼歿學成盡力營葬以慰母心  
建祖祠置祀田善行多此類

縣志

旌 縣志

監生吳樹崇安縣孝子乾隆間

邵武府

明

謝恩邵武人幼失怙母朱氏年甫二十一孀居撫恩



成人成化六年母病卒恩哀號擗踊三日勺水不  
入口絕而復甦既奉柩與父合葬躬負土成墳結  
廬居墓側寢苦枕塊疏食水飲朝夕悲慟三年非  
奉祭祀夫婦未嘗一相見每歲忌日輒齋戒終月  
每朔望日必躬詣瑩拜掃年六十孝心純篤不以  
老而衰府志

李純智泰寧人由貢歷任通判善事二親敬兄如父  
居官有慈母之誥囊無餘貸首刲醮田復置田祀  
兄尤人所難也府志

劉台卿光澤人性孝極貧攻苦有志時年十八父志

堅病痰幾不起苦無醫劑潛夜禱天剖左股煮湯  
以食之病遂愈不數日母葉氏復病劇仍禱剖股  
以進母病亦愈萬曆辛丑補邵庠生府志

江繼瀾光澤人菽水奉親言無苟出少失母父復雙  
瞽奉之靡不遂意俗尚誦經父常越經堂會誦至  
暮瀾必負之而歸歷三十年如一日娶危氏三年  
歿遺男方二歲自撫養之授以舉子業署縣事蕭  
通判上其事按院劉賞銀褒嘉扁曰孝義閩書

張遇。人幼年失父事母楊氏孝母病疔幾死醫  
莫效遇禱剖股煎藥服之遂愈未幾母足生人面



廬建紀元 卷五十二  
瘡痛入骨日夜叫號遇不知所出禱天期以身代  
仍封股和藥以進瘡卽痊母壽七十餘

陶鉞邵武衛軍嘉靖三十九年流賊逼郡有武生楊  
永紹丁應機府吏聞竒過萬年橋賊追急鉞時爲  
銳手舉空銳向賊三人因得脫旣而伎窮爲賊毒  
殺有司命葬於西塔豎以陣亡勇士陶鉞之墓府志

廖成賢字赤許建寧人少負氣誼重然諾遇事剛果  
直行歲壬寅學宮燬成賢倡義重新萬歷己未以  
貢謁選授和州州判有能聲陞靈川知縣丁內艱  
服闋補永淳縣縣圉粵西之僻瘠地也民染徭俗

士不知學成賢以禮義誨人課士陋風大變而且  
虛心以決久滯之疑獄捐俸以築水圯之城垣累  
累善政上下交譽考績時膺兩臺最舉病卒於官

府志

危純中字守道邵武人英毅沉重言笑不苟人自不  
敢褻視旦喪父事母誠敬母死會純中應試省闈  
奔歸抱尸不舍流血號天滴水不入口者三日兄  
病溺穢俱不自主純中朝夕抱負湯藥親嘗歷數  
月未嘗倦兄嘗謂吾非弟早從地下遊矣弟兄同  
爨四十餘年無異心以書經領萬歷鄉薦司理瓊



州執法不徇三載未嘗輕出入人罪瓊海事幾蝟  
集署篆持大體與民休息有激變生黎者純中撫  
諭之尋平服生平以至誠待人<sub>縣志</sub>不輕然諾循法守  
正奏最擢夔州同知未幾以疾卒兄用中令大竹  
亦卒於官

鄭可大字居業鳳孫萬歷間以選貢授惠來令為政  
持大體先教後罰邑濱海難治大陳其弊獻六議  
民甚便之調停隆井鹽課查丁審引鹺政遂不為  
蠹歲大稜烏船敗糴踵至可大嚴為禁而發粟賑  
民歲不為災林華封鄒白眼皆逋寇人莫敢誰何

可大生致之邑乃安堵他如城靖海之城建蓮古  
田二橋飭學宮新講堂皆捐俸經理不費民一錢  
已而以卻販故陰忤當道可大嘆曰吾不負百姓  
足矣遂解組歸居林下風尚高雅絕跡不為干謁  
年五十九卒<sub>府志</sub>

張于屏字綏侯邵武人萬歷舉人遷葬祖父母五柩  
殫心盡力戊辰列副榜後令金堂甫三日流寇猝  
至于屏督鄉勇禦之寇獲其姪鴻業剛目剖心弗  
顧也以援絕勢孤與久任城陷者同罪次子鴻儀  
匍匐走數千里擊登聞鼓申父冤乃獲釋而歸<sub>府志</sub>



吳起龍字德溥邵武人幼聰敏篤學年十四補邑弟子員父一山以選貢入京廷試久絕音耗龍思親尋訪入都遍覓父勿得勞瘁哀慟至家成疾遇異僧施圭匕乃痊人以為孝感所致尤善書楷草皆倣王右軍筆意應萬歷末年貢詮部考選第一授江西上猶令居任清慎有渠賊以苞苴行餌起龍怒宣之法士人仰望其丰采焉歸林下督課子侄暇則詩酒自娛郡守魯史以總修郡志請龍與焉舉鄉飲大賓十次壽八十終

續府志

鄭之賢字立宇邵武人言之孫也天姿靈異泰昌選

貢授安鄉令初抵任凡里長馬戶例有常餽約千金許賢曰陋規也卻除之永著為令先是縣有驛馬四十匹悉派民間牧養供應往來無少休息民力疲甚之賢廉其狀改為官牧民咸德之他如隆學校禁火耗懲輕生雪沉獄善績尤多會洞庭水溢邑中田禾盡沒民皆就食他方稅糧無徵之賢以已俸二百兩抵解因課不及額調北直栢鄉教諭尋罷歸

府志

趙獻璧字時輝泰寧庠生獻璧父好義貲產日落弱冠父喪晝則坐肆為賈以奉二母甘旨撫養二幼



弟夜則篝燈誦讀竭力盡瘁妻生子國祥僅半歲  
不得嫡母之歡心立出之私誓子成立當終身不  
娶設帳訓生徒貧者不責束修多方造就及門多  
顯者學宮不利首倡改建於邑治前又察復學田  
以贍寒士邑建文昌塔費貲無算議者難之獻璧  
力勸富室助之邑自改學建塔後科甲倍昔璧勞  
勩居多也初嘗有訟者攜重賂請璧求關通璧峻  
拒之其生平廉介皆類此孝友行誼孚於鄉閭始

終如一

府志

蕭建寧秦寧人善事父母至老不倦有萊于舞班之

風隣族中多為感化

府志

李明賢建寧人質性端謹母亡後卽斷葷茹素念父  
老且多病晨夕侍寢處有故外出雖丙夜必返及  
父歿遂於停柩之旁苦寢其側凡遇飲啖必肅容  
先獻如是者十九年直指李公賜以孝聲茂著扁

額

續志

朱國漢字為章建寧人少孤事母以孝聞崇正甲申  
聞變狂走登故越王臺址北向號慟累日夜不休  
悉焚素業托於賈人以自晦歷吳越燕趙荆豫與  
僮僕傭僧共甘苦權子母所至遇古忠臣名賢祠



廟墟墓俯伏拜奠歌詩憑弔有騷人之遺意與同  
邑丁之賢有綏安二布衣詩鈔蕭山毛奇齡爲之

序

榕陰詩話

丁之賢字德舉建寧人崇正時流寇起西北之賢挾  
策入都客南司空邸第欲獻書闕下言兵事會司  
空罷歸秦中挾之賢與俱書不果上之賢請於司  
空辦裝齎糧短衣疋馬循賀蘭山出長城訪求古  
戰壘畫沙聚米爲擣賊計謀甫合而李自成陷西  
安被潼關明社遂亡之賢念家有老母脫身南下  
有王將軍者建牙汀州聞之賢名招致幕下復稍

稍資給之贈之以婢生一子未幾王將軍調去之

賢偕婢僦屋城東桃花溪上以卒

榕陰詩話

國朝

廖應龍泰寧人有母耄而瞽奉養唯謹順治九年游  
兵破依口長關龍率弟負母前遁自執鉞踵其後  
兵將逼矣龍一人且却且拒如是者久母得全

府志

朱臺黃惠塗人耳義相結而爲賈兄臺而弟惠兄行  
賈弟居貨兩人一甘苦出入弗籍盈縮弗稽迨貲  
盈畝益則質劑書一姓掌握任一人且母家娣姒  
雍睦臧獲趨事如一主後臺族有胥而盜庫鏹者



累臺償五百金惠取兩人公帑償之臺有子二惠  
子一迨析產欲以子為率分而為三臺欲以身為  
率剖而為二此亦近代之哀桃管鮑矣縣志

汀州府

唐

賴小大郎長汀人襲指揮以孝義聞在螺墩潭中獲

金牛有司以聞詔悉還之賴創金泉院仙隱觀金

砂橋復置興賢莊田二百畝詳見古蹟府志

五代

雷伯泰寧化人父詳唐進士生子八人生相友愛約

葬同邱塚以聯同氣之誼子孫遂守遺命而葬之

長伯泰次立次馴次強次郡次御次郇次均皆以

名繫伯其墓在縣之沙村國朝副都御史鉉其

裔孫也方望溪集

明

許浩志連城人以舉人為同安教諭未任遇寇發率

鄉人登冠豸寨協力保障眾賴生全府志

伍伯遜寧化人僑寓南昌與弟伯暘伯達同居數百

口雍睦無間祭酒胡儼嘉歎之子恒從吳與弼學

景泰間辟賢良以親老辭府志



雷稔清流人母卒值寇至舉家奔竄稔獨守母尸不  
去賊憐之不忍殺成化間歸化民葉永堅遺銀六  
十兩稔中子道拾之歸語稔稔命還永堅一無所

取府志

童玘武平人正德間寇作以勇士應縣令劉璣募及

璣被執玘率眾直抵賊壘格殺遇害同邑江環李

賤生俞世旺同赴義死詔賜恤從祀璣廟府志

程仲武正德間賊經武平挺身赴難死之府志

曾軻寧化人有異術嘉靖中廣寇顧子傳突至軻率

男婦百餘人屯北門山樹下賊至若無覩者知縣

神其事委之禦寇時賊乏食四出抄掠軻募壯士

黎永達雷某二人設伏誘賊首子傳出擒之餘悉

遁當事嘉永達勇欲辟為中軍永達曰向者之役

吾為地方紓一時之急耳辭不就而軻亦病目旋

卒府志

馬榮長汀人嘉靖中禦寇死焉子如龍亦以孝聞縣志

吳毓嘉長汀人性孝友繼母鍾氏日盲以舌舐之父

因食榴卒見榴輒感泣不忍食生母賴氏柩被盜

匿去毓嘉籲天披荆歷險獲歸安厝以歲貢授來

安訓導陞湖口教諭歲饑所得俸悉分貧士空囊



而歸府志

林上元寧化人嘉靖間繼母為寇所掠上元奮不顧身持鎗殺寇奪母而歸府志

張友信寧化人嘗於四門設義塚以瘞枯骸復捐租田煮茗修橋造舟設渡以濟行者府志

鄭廷惠長汀人時苗嘗為累惠獨鬻已業以應嘉靖季寇亂兩弟被執捐金詣壘贖之更為弟償貸贖

產人皆服其義府志

胡汝橋字瑞虹長汀諸生性至孝母歿哀毀過情廬

墓金斗山父得噎病閱四月父進一粥則已進一

粥父噎已亦痛不食父歿躄踊骨立而死縣志

詹恒高上杭諸生性孝友父商於外祖柩厝南岡洪

水驟浸時恒高年十三即號哭倩人移柩柩出水

已沒所厝矣居喪哀毀骨立有友某館永定病沒

恒高經紀其喪輿櫬歸時分束脯贍其遺孤縣志

馬懋德長汀人山寇肆掠與姪乾分禦漁滄隘汀人

恃以無患乾禦牛嶺隘失援遇害邑人祠祀之乾

妻黃氏亦殉節死府志

邱雋字慎夫寧化人崇正辛未武進士授泉州守備

清介自守恩撫士卒有儒將風解組歸值田仰漬



卒至鄉人悞以為寇强雋為帥禦之兵未交而眾  
自潰雋遂遇害雋有戚屬吳維城奔救無及亦死  
之府志

張翼鵬寧化人任香山澳都司崇正中解紅彝銃至  
京兵部欲別差解往登州翼鵬自請往卒於難府志

國朝

李楷字有端長汀諸生康熙間歲屢稔咸出粟以賑  
復築鄭公陂人享其利府志

黃國舉連城諸生順治四年土寇據城被執迫撰偽  
示安民國舉大哭罵賊而死子拱高嘗捐五十金

代周世遠償債免其夫婦離異人咸義之府志

項惟祿連城人明末大饑惟祿施予糜粥以延殘喘  
又掩埋齧骼時流寇四起乃傾產募鄉勇捍禦幸

獲保全縣志

藍植字孕和武平諸生順治丙戌粵寇犯境植募鄉  
勇守金鷄大嶺隘賊不能攻圍解鄉民乏食出粟  
以賑子灝春有擒林耀祖功府志

項人龍連城人以太學生授潮州推官未任而明亡  
遂隱不仕順治戊子楊齊雲劫掠河源里人龍父  
時選禦寇陷於池人龍日死赴水救父並遇害府志



林鸞上杭人順治丁酉舉人甲寅耿變偽將劉應麟  
 威脅從逆不屈應麟怒械至汀州旋釋歸丙辰大  
 師平復閩疆應麟兵遁繼而率眾據城不納邑人德  
 之府志

盧光萬永定諸生當鼎革之際土寇延蔓官軍欲盡  
 勦之光萬慮株及無辜率眾攻擒殄其渠魁餘悉

平府志

蔣受俞正春子從正春擊賊於涯婆嶺殺獲最多康  
 熙甲寅耿變拒偽劄弗受率眾立社為守禦計後  
 以援泉州功授守備府志

鄭永大永定監生事繼母極異弟以孝友聞歲饑  
 粟賑貸康熙間豁免錢糧有主七佃三之令永大  
 復全蠲佃租以廣皇仁府志

林捷春武平人年十四粵寇犯境將殺其父號泣請  
 以身代賊憐而釋之母病日舐之復明人稱其孝  
府志

雷世守字衛天寧化人甲寅之變奉父母播越險阻  
 以避志養無違父為仇家所誣世守以身代質自  
 寧抵府晝夜行二百里咯血數升事得白而家以  
 大乏親歿歲時祭祀常作孺子泣叔父歿於江右



諸孤藐爾亟逆櫬歸與父合葬焉家居新祠宇修  
譜系備祭器族之無後者書於牌定期以祭墳荒  
者甃石誌之子鳴高邑廩生醇質而善文以孫鉉  
贈中憲大夫副都御史

世遠  
拱誌

陰燮理字寅賓寧化人善事母時土寇竊發燮理上  
六議當事多用之後叛師訂變復捐金勵眾為驅  
除寇懼而遁父母喪哀痛而死著有愼餘堂集

府志

王名佐清流人當耿逆之變羣盜四起逼城郭名佐  
率鄉人與賊戰邑賴以安其子雯死於陣

府志

童偉清流人當耿變偽將副應麟勸偉父受劄堅節

不屈脅以非刑偉出數千金賂之得脫康熙初臺

洋鄭黨散掠郡邑時清揚未設弁營偉為母疾篤

多出金粟募里中丁壯守濠壘闔邑得免於難父

歿廬墓三年性樂施予荒稜賑恤不遺餘力乾隆

間旌

府志

曾斌生清流人甲寅耿變斌父若渠被執衝圍輸貲  
請以身代賊感而並釋之後父患癰百療不效斌  
號泣禱天吮咀其毒而愈

府志

童日鼎連城貢生父在浙為人誣陷於獄鬻身以贖  
耿逆之變力拒偽職任壽寧訓導巡撫張伯行器



重之府志

李國蕙清流人少孤居喪盡禮值寇起男婦奔逸國蕙守棺不去賊欲火其居力拒之刀傷左臂猶罵賊不休賊亦感動不復舉火及葬築廬墓側日歸奉母夜出守墳里黨欽之府志

蕭士魁長汀人康熙丙辰寇變奉母挈兒走避至中途母踵躄不能進士魁棄兒道旁負母疾奔後兒為族人所獲卒完聚焉府志

李夢烈武平人事父母鷄初鳴即入問安父病日以舌舐而愈母又患痢朝夕服勞以手承穢疾尋愈為人樂施與借貲以贖人妻鬻產以救客子同里

李崙周文美鍾國安亦以孝聞

鄧星弁清流人品端行篤父早歿哀毀盡禮雖墓草屢易哀念不忘康熙雍正間二次以粟賑饑全活無算

童廷瑞連城人負母避寇賊欲害母泣曰若獨無母忍加害也卒釋之隣人吳七弗順於母一口與廷瑞同行迅雷震吳昏仆瑞獨無恙吳亦感化同邑羅起彰亦負母入山遇賊哀求得免嘗殮埋舟溺七尸人咸義之府志



羅承紹長汀監生家貧備極色養每奔走數百里獲時鮮必歸以跪奉老親親歿哀毀一如古禮骨肉極友愛三世一門不忍異產凡掩骼埋齒修葺橋路弗可悉紀府志

羅爾鵬連城監生兄某死蜀爾鵬為萬里奔喪路為苗掠幾死者數泣以情告苗亦義釋之府志

謝世重連城監生幼孤事母以孝母患背疽百療不痊世重以口吮毒日備號泣及歿哀毀失血友愛其兄推廬讓產自取其薄瘠者大吏旌之府志

周朝聘字公尹長汀太學生恪敦本行事繼母四其能得其歡心兄死代撫遺腹孤姪夭又撫其四孫俾克成立里閭以孝友稱制府表其閭以倡修文廟請入祀功祠府志

余若琮日煌子連城人自祖廷褒與伯祖廷謨兄弟友愛世傳孝友若琮嘗隨父舟行至九龍灘險舟壞父溺琮冒險救父值寇亂盜欲傷其母哀慟呼籲賊憐而釋之昆弟數世同爨人稱義門乾隆間旌之府志

謝朝庸寧化人幼孤苦能力孝養逆藩之叛舉家避村落中募鄉勇起團練自成壁壘賊不敢窺丁巳



王師靖閩流民失業朝庸毀家輯之又捐創祖  
祠置祀田尚義好施歲稔民饑多設糜粥以賑當  
事旌其門府志

周天鼎字禹成連城監生性恬淡喜施與人有宿負  
不能償輒折券還之橫逆之來犯而不校詩派宗  
阮陶課子弟奉朱子家訓為式弟天撫姪如巳子  
人比田真姜肱云府志

鄭維崑長汀人恂恂長者父母俱染瘋疾維崑日夕  
祈禱歷十餘年如一日康熙丙戌洪水作父喪七  
日柩為浪所泊維崑割呼號天柩以逆流返入舍

八稱孝感所致雍正間祀忠孝祠府志

曾鏜字叔啓弱冠游庠留心經濟之學惠施鄉里備  
竭心力郡有壽山橋萬行橋山水發無期鏜作二  
石梁人不病涉康熙中海寇猖獗軍民乏食郡守  
舉鏜運糧協濟軍民賴以全活府志

黃文禛字雲章上杭人五歲父歿哭泣盡哀七歲就  
外塾同館有送瓜者分食之文禛受瓜不食曰留  
以奉母年十三營父葬事而雨不止文禛號泣呼  
天俄而雨散日出僉謂孝感母病床蓐三載躬親  
易燥濕日夜不離側及卒哀毀如癡年七十四夢



母召即預知死期焚香拜天地祖宗端坐而逝同  
 時有孝子數人薛桂奇侍母病累月夜不解帶及  
 歿負土成墳溫濟早失怙授經至蓼莪章輒流涕  
 思父而事母益孝陳鸞事繼母如所生父歿喪葬  
 獨任之遺貲悉讓兩兄又捐千金建宗祠劉翥鳳  
 負米養親貿易得贏與弟均分薛人驤不仕奉親  
 出入必告必面林成耀父母雙盲入挾出負朝夕  
 祈禱親目復明有司俱旌焉縣志

任惠民清流人父歿五月始生家貧力穡以奉菽水  
 時痛父歿血淚交迸母死呼捨肝腸碎裂而卒府志

忠而懷其惠者縣志

迭應球字桐君鳳山人性耿介尚氣節巡撫張伯行  
 以孝廉方正舉不赴後朱一貴亂南路賊郭傳募  
 使畫策應球不可強迫之則給曰明蚤往歸即挈  
 家夜遁募者不獲焚其廬亂平掌教書院十餘年

卒縣志

卓夢采字狷夫朱一貴募致之夢采曰不善不入昔  
 有明訓辭不起強之再三虞其不免挈家遁鼓山  
 深處吟咏自娛散其資以給戚屬隣里戒曰寧餓  
 死無從賊一鄉皆化為善良



劉魁才原籍廣東後家臺灣朱一貴為逆魁才率義民李直三殺賊有功授外委雍正十年大甲番作梗叔知縣陳同善魁才奮勇擊賊脫同善之危時陣亡者陳第五富陳純臺灣人林相國黃國軒黃彩揚龍溪人張保南靖人陳榮漳浦人李壯詔安人黃德惠安人黃自達黃啓熊陽邦連徐如旺廣東人曾良漢曾維光巫鳳正程鄉人洪旺南安人蕭燕童法同安人鄭綸永春人趙會鄭五陝西人黃開湖廣人余丙候官人後魁才從總兵呂瑞臨於大肚溪北征番番突至縱殺陳亡是年提督王

行者病之奏旋欲易以石不果疾革遺命繼妻雷氏與其子士窩士宣士官等卽於雍正十三年鳩工至乾隆四年而工竣更名安寧橋費四千金有奇十一年奏旋祀忠義孝悌祠上窩士宣俱議敘

府志

雷在雲字瑞熊寧化人幼讀書後服賈客遊楚粵歲必歸省嘗適漢口道拾遺金在雲持以待至晚有客來泣告在雲還之客欲分不受問姓名弗告亦不問客姓氏其外舅馬某無嗣欲以產之半為義莊半予在雲在雲不可為之覓妾強勸其納之後



生子麟入太學時父母年高遂歸奉養及喪哀毀盡禮兄晉庠生寔甚在雲瞻之待弟亦然年五十八卒族叔鉉為志墓稱其有士君子之行子維觀歲貢維泰乾隆癸酉舉人孫兆乾諸生雷鉉撰墓志雷崇禮寧化人幼嗜學康熙六十一年偕父應郡試父卧病旅舍既入闈城中火起崇禮踰垣出冒烟焔負父出手足焦裂嘔血不可止人欲以孝行聞當事崇禮止之曰事父母能竭其力分也豈邀名乎後父歿廬墓六年又性樂施予節館金以惠急難嘗於黃泥舖拾連城黃世瑞遺金五封候至晚

還之府志

廖季翹永定人侍奉父母雖處窮約而洗典必豐母病喪明以舌舐之六年浣滌躬親舉動必循禮法

雍正三年 詔旌其孝府志

羅其豐清流人時曹天貴寇掠父被執其豐隨父往晝夜號哭賊義之而歸其父次年陳嬰復寇築土堡為一鄉守禦計丙午歲飢煮糜以飼餓者府志

湯聖球清流人年十六失怙家貧祖母老而思子聖球奉養起居親扶掖之及卒殯殮盡禮連遭喪故家無儋石遂棄儒而賈供母菽水晨昏定省無怠



父歿時弟甫生四月乏乳聖球日抱弟丐哺隣家  
稍長督就外傳謀婚娶至老共爨而食無間言又  
善撫弱妹及笄擇配歸之母寢疾籲天求減算以  
延母壽卒不可救聖球絕粒號呼母歿半月而聖  
球亦逝人稱爲死孝云

縣志

巫天嶠字眉山清流貢生性至孝五歲喪母泣不欲  
生父死廬墓五年著哀哀吟孺慕藏稿五經要畧

漁滄廟志香遠堂集

府志

馬履序字彬然長汀廩生孝友樂善康熙戊子歲稔  
出官畚莊積穀以賑饑耿逆之變負父逃蕭屋山

募鄉勇爲守禦計乃免於患鄉人德之從祀忠孝

祠孫在時字躍宜邑增生還潮州黃饒用遺金八

十四兩乾隆中

旌表邑令方暨謨作傳

府志

監生戴家基長汀縣孝子乾隆間

旌

縣冊

福寧府

元

陳預九福安人有勇力至正十三年政和穆洋康二  
得謀逆劫預九以僞爵脅之馳歸自縊邑人重其

義

府志

明



高頤字應昌福安人性至孝親沒廬墓三年嘗教鄉校日暇輒至墓拜哭洪武初舉孝廉上曰何為孝對曰臣不能孝惟生事葬祭不敢違禮又問何為廉對曰讀書修身雖貧不苟取而已又問所讀何書對曰勉讀經書但媿未明以稱旨授海鹽令卒於官祀鄉賢

舊州志

阮貢福安人三歲孤母卓氏甘貧守志貢竭力事之母病湯藥必先嘗日不交睫者數月籲天減壽延母母八十卒水漿不入寢苦枕塊烏啼集其屋既葬刻木為像事之如生親有遺髮寶藏不怠

府志

蔣文臺字彥高霞浦人侃諤不阿慎取與人有不給周之宏治初御史宗彝按部令舉善行三人文臺

與杜子新俞棫榜旌善亭以示勸

府志

林琦字宗韓霞浦人思齊子性純孝母病侍湯藥衣不解帶逾月趾腐緣母病遂通醫業活鄉里甚眾舉鄉試知高淳縣平易近人民有病與藥輒痊遠

近德之

閩書

陳喜字希和霞浦人積學能文渾樸若椎魯蚤孤孝事母母多病躬侍晨昏自衣服飲膳櫛髮盥洗至踰厠必親之及老兒婦請代弗許母九十四終服



勞數十年如一日喜年八十府志

周大賢霞浦人在妊三月父亡成童依母不少離夜  
祈天祝母家籍隸戎戍海上明發哀思淚漬枕席  
當道聶公豹憐為脫籍自其母節而旌之知州史  
起欽嘉其孝府志

繆邦棘字良卿福安人少負奇氣能文章試輒冠軍  
與人交規過不倦父疾革乞以身代執喪哀毀骨  
立奉母温清備至督學旌其孝友年三十五卒著  
有藤囊草府志

吳德茂壽寧人孝友而勇於有為父母喪廬墓三年  
歲饑顛連無告者賑之貧乏無償者焚其券縣尹  
旌其墓府志

張子成霞浦人性好義有友人將鬻子完徵代之輸  
並取其稻百餘石慰而釋之時稱長者府志  
柳必用壽寧人父瞽必用以舌舐歲餘日重明壽至  
八十母痼疾三年嘗糞告母復延年撫弟姪皆出

至性天啓七年邑令周申表曰孝行可風府志

湯農寧德人赤貧養母母七十病劇思瓜時冬月無  
瓜遠至霍童山朱姓得一瓜重價購回奉母疾遂

愈府志



鄭滌字自新寧德人承順悅親父疾篤祈天減年為親壽親歿廬墓數年晨昏號泣聞者墜淚縣志

劉泗福安人少孤患瘋孿母吳氏相依為命長娶於薛婚兩月母卒號泣仆地絕而復甦者數次葬其母於磐石晨夕詣哭烈風甚雨望墳大慟聞者傷之著有種德集卒祀孝子祠府志

陳三達字智夫福安人母疽背割肉敷之愈又病亟三達號天減算以延母壽割股和藥進之疾瘳與郭大順孝友並著云舊州志

國朝

陳端視性剛直膂力過人與林允忠服賈耿逆為亂陷賊中誘以偽爵不屈罵賊死府志

危必昌霞浦貢生性孝友兄弟三人同爨無私財樂施不倦值歲迫秉燭夜坐周給貧乏不問姓名子姪興梅與樞孫祐啓俱登賢書議者以為善報府志

游瑄字友玉霞浦人性孝友事父母能得歡心兄瓊早故嫂常疾遺姪七人俱幼瑄時方壯無子與妻林氏撫兄孤如已子各為婚娶後以兄子庠生煒為嗣姪炯焯俱登賢書府志

吳士省字若曾壽寧人性友愛有弟自耗其家不能



婚娶仍給其貧乏又折屋開通水道入泮池工楷  
書通易理精於卜筮賑恤尤多舉賓筵卒年八十  
六邑令趙廷璣旌其門府志

陳大煜字元昭福鼎庠生性友愛少孤事兄至敬好  
施與有貧而貸者不能還則焚其券鄉有兄弟爭  
產不決煜平之夜歸中途鬼為持火與兄元章俱  
年八十餘府志

左天墉字御青寧德人家貧砥行風雅多才精書法  
領康熙丙子鄉薦少孤依於祖母孝養承順祖母  
疾躬治溺器侍湯藥衣不解帶及歿哀毀骨立立喪

葬如禮未仕而卒府志

王鳳翔字紫庭福鼎庠生減糴賑饑捐置學田急公

尚義事親不離左右凡飲食几杖必親進父疾湯

藥必親嘗及歿哀毀骨立至老與親友道及輒歛

歛流涕府志

鄭世源字伯澄福安人幼知大義母病篤世源割股

和藥飲而愈弟世派字伯裔隨兄徙居康園世源

嘗為虎所搏世派奔救虎遂逸人謂二難府志

葉亞字希元壽寧廩生少孤事母至孝家貧力田供

母年七十五奉侍不離左右有疾數月衣不解帶



母歿哀毀卒

府志

范孚字伯尹壽寧人性孝母病禱以身代刲股以進至誠所感不藥自瘳逾年父卒家貧負土以葬力竭而卒士論哀之

府志

范光瑛字常修壽寧人事親孝處兄弟無間言掌教義塾從者甚眾徵儒學不就八十餘歲清操如一同時柳攀龍亦以孝友聞

府志

游鳳儀字儀韶州庠生以孫炯貴封文林郎早孤事寡母以孝聞篤友恭盡以腴田讓兄母卒喪葬盡禮伯氏中落鳳儀復為之殯葬修郡學及橋亭道

路靡不率先倡捐

府志

楊勉字及修郡廩生性孝友養親承志弟兄四人及子孫四世共饗將滿五十口內外無間言凡一錢一帛不私於室婚姻喪葬祭祀飲食分給有常數一門肅雍縣令藍應襲旌其門曰孝友兼全

府志

臺灣府

國朝

吳振生臺灣人勇於為善邑治十字街為郡城通衢振生出資悉砌以石行人便之次子有聲康熙壬

午武舉

縣志



傳夢弼字帝簡臺灣人髫齡餽於庠家酷貧常減殮以贍其母母病卜不吉夢弼禱於神求以身代凡七日母痊而夢弼病卒縣志

黃國英字遜卿臺灣貢生淡水都司曾榮子少好施予戚屬貧乏者月給銀米以贍之北路鹽水港淤塞舟楫難通國英捐已業龍溝潭莊西棟榔塢截其半復出千金別濬一港遠近載貨之舟賴以抵府仍增置營房請於總鎮王郡撥兵防守尋以州同卽用卒於漳縣志

侯瑞珍臺灣人性淳厚少孤善事節母明庭無間言

母歿時瑞珍年六十六矣廬墓終喪七十四卒縣志

施世榜字文標臺灣拔貢性好施間黨姻族多所周恤建敬聖樓於大南門外募修以拾字紙由壽寧教諭授兵馬司副指揮令長子貢生士安捐資修葺鳳山學宮又置田千畝充海東書院膏火令第五子拔貢生士膺捐社倉穀千石皆其義行也縣志

陳鵬南字雲垂臺灣人篤志力行與兄安國定國柱國四世同居百餘口莫不敦睦司訓連江除陋規勤考課與諸生論文尤以實踐爲諄諄乾隆二年連邑風災文廟倒塌殆盡鵬南傾橐修建又採



買穀石平糶貧士及開河輸銀制撫上其事 詔

加一級府志

曾潛龍臺灣人少失怙母房氏食貧守節潛龍事母至孝篤友于之誼與物無忤至於葺祠宇橋梁及親串婚喪緩急無不盡力人感其惠子口輝監生

縣冊

林為棟臺灣人性孝友篤於家庭和於里閭恤孤慈

幼一鄉稱其孝弟縣冊

林公業字永秀臺灣人孝事父母於昆弟友愛性好義問里有不平者感質成之排難解紛無不服其

曾篤周清流人孝事嫡母母病禱求減算延母壽累

愈及歿慟觸屋柱絕而復蘇每讀父書執母器悲

啼不已同邑鄒時翊善養親周急並稱孝義府志

張雯錦連城庠生事親孝親病侍疾罔懈及卒二載

泣血未嘗見齒友愛昆弟五世同居縣志

張孝瑤連城人家貧力田養親時值寇變負母避山

中涉險百里外力作以供饘粥父渡溪溺孝瑤援

而出之父虞後涉者遂築橋以成父志同里童蘭

盛柯城力耕奉親以孝弟聞縣志

鍾振春武平人幼喪父哀毀備至事母孝母病躬親



厠踰穢褻之事母目疾朝夕舌舐之兩目復明縣冊

伍立觀寧化人年十一失怙事母盡孝母患喘立觀

朝夕侍羹湯藥餌必親奉不以委妻孥歷五年不

懈及母卒絕粒四日三年不飲酒食肉縣冊

傅維清字斯漣上杭人居父喪盡哀水漿不入口母

歿哀痛至失明服闋目復明里有浮糧百餘石民

苦無償維清痛言其患陳情豁免里人賴之縣冊

鄒元振清流人幼失父奉母曲意承歡耄年猶侍膝

前作嬰兒狀及歿盡哀遇諱日哀慕如新喪縣冊

伍秦旋寧化人性孝友尚義寧東有木橋遇水輒圮

郡征大甲西兇番義民周宗盛古坵成陳正學等

充鄉導九月乘勝銳入由大甲西歷溪登大坪山

宗盛等與賊對壘戰死之縣冊

張從政字達夫臺灣人事母盡孝乾隆五年分修郡

志著有剛齋詩文子岳丙辰舉人縣志

永春州

宋

張興渭德化人母病百藥弗痊興渭籲天剖肝以進

母病立愈閩書

鄭師孟字醇仲德化人操履純端窓几閒書聖賢格



言以自警二世同居睦族調隣事親教子咸可師

法閩書

明

陳嘉謨字思復永春人嘉靖中貢生廷試第一授道

州學正調均州陞國子監學錄不就居家讓產伯

氏有孝友聲掌教二州時捐俸賑饑修學時稱君

子舊邑志

李陽初永春人謙謹若不勝衣幼孤事繼母至孝母

歿哭之傷肺病哮終身好施予尤急其族人為續

一鬻子而婚之嘗建啓聖祠立義田築陂以資鄉

鄰灌漑閩書叅續邑志

王廷鉞德化諸生有陰德活人於死者姪三聘以孝

稱母病割股病旋愈閩書

涂洪三德化人有勇畧嘉靖初汀漳盜猖獗莫禦各

縣督兵會勦賊奔邑之小尤中團遁入民黃舜大

冢洪三度其當夜走獨持短兵伺於要路盡殲之

以功授指揮縣志

顏鉅卿永春人時謝愛夫來寇鉅卿佐訓導呂獄竭

力守禦寇退築城有功復置義塚以瘞遺骸人欽

其義纂續邑志



曾滙德化諸生邑民耕屯田者為泉郡豪幹所虐滙  
貲助佃民周龍珪寇十六等叩闈事下各佃歲省  
浮費數千石滙前後費千金龍珪瀕死獲免而十  
六竟為勢豪所害縣志

陳倫大田人自始祖壽山至倫凡六世同居共爨長

幼雍睦舊通志

陳輝世大田諸生遭喪遇寇出父柩於鋒鏑之下又  
嘗遇災出母於烈火天為反風育弟恤鄰名多里

閏延平府志

魏光輝字有本大田人鄧茂七亂與蔣伯良結砦捍

衛以吏任龍泉主簿值歲饑賑恤有方大田縣志

陳誠大田人值鄧茂七亂誠與兄忠率義兵三千擒

賊將余寶斬首數百忠亦以孝友聞大田縣志

國朝

劉鈺字式侯德化人順治己未隨父僑居大田父為

賊所虜鈺傾家集鄉勇三百餘人攻賊竟出其父

德化縣志

謝猶龍字颺儒德化諸生性孝友服賈所得與兄弟  
共之二兄歿撫諸姪子姓數百指不析箸仲兄子  
虜於賊猶龍求以身代賊義釋之順治末遷民流



離傾貲以賑多所全活子青鐘康熙壬子舉人知  
瑞安縣有善政著有越山十顰怪齋史誤詩詞文

集德化縣志

溫榮三大田人 國初寇作榮三與戰死焉時同被

難者有楊連五林聯四張正元林阿相吳子華樂

阿蒼林爾英曹景二陳永三葉紹薇章標九饒別

我吳春榮田阿貞葉三品林阿先張顯忠鄭思高

蔡子星陳宗興陳我宇劉阿壽二十二人府志

李綠字儲奎德化人康熙初寓邵武甲寅之亂邵武

令某為賊所脅綠力護之致芻米贍其家總兵樂

燦招安復叛將盡殲萬年寨二百七十餘人綠亦

救得免德化縣志

張祥斯大田人性至孝康熙間父永吉有罪當刑祥

斯號泣請代有司察其誠為論減父得不死州志

徐士萬字咸甫德化人值海寇索餉徐姓叔姪四人

士萬獨往拷掠無完膚偽縣令某誘之曰呼爾叔

出吾免爾士萬佯諾而密令諸叔遠遁越日某怪

其不至士萬厲聲曰某已在網中安可令諸叔同

人死地乎我但有死耳某嘆其義遣之德化縣志

王業煥字韜光德化人慷慨好施嘗焚券於雲龍橋



賊陷縣城東門磨石嶺屍相枕藉業燬密荷畚往埋數日屍腐難近有告賊使收業燬者業燬笑曰死者有靈吾知免矣

德化縣志

鄭振郁德化人甲寅山海嘯聚捐貲集鄉勇捍衛有

劉姓者為仇人所縛乘亂將殺之振郁持百金以

贖又有泉郡人見擄於賊聞振郁好施詭稱有銀

寄振郁家賊令往取值振郁外出妻如數與之得

不死振郁歸知其偽而不問人尤高其義

德化縣志

郭于暹大田諸生康熙甲寅于暹率鄉勇為守禦計

偽將攻之不克乃退鄉里獲安

州志

鄭啓岐字用山永春人夙尚氣節歲祲出粟賑民至

鬻田買米邑有相讐者欲因死為利啓岐力勸得

解孫夢馨任武宣令贈如其官

州志

尤元會字禮侯永春人嘗葺學宮新城隍廟造永安

種德二橋修州東南至五通格西北至虎豹關孔

道百餘里雍正丙午歲饑出粟二千餘石賑之乙

卯大水復捐貲周卹當道旌其廬子錫觀臨清知

州錫蘭貢生有父風

纂續邑志

龍巖州

明



陳雍漳平人宣德初以歲貢入監除戶部陝西司主事陞本部員外郎卒於官雍天性孝友居母楊氏喪哀戚盡禮已田讓與其兄子從弟貧不能婚捐貲助之邦人欽其德讓

閩書

柯潤龍巖人事繼母以孝聞幼失恃遭亂忘母棺埋所朝夕哀號求之不得忽有異人指其處而獲焉羣以爲異以子元伯貴贈東陽知縣

州志

張秀岐漳平人嘗爲鄉練總從知縣魏文瑞勦賊文瑞遇害當事律以失護之罪責令勦賊贖死秀岐奮不顧身率衆直抵賊巢示以單弱誘賊首楊一

出戰擒之剛以祭文瑞事聞授千總

舊漳平志

陳原吉漳平人性至孝親歿既葬結廬墓側悲號三年將歸有山人指其墓左曰此吉壤也及已歿遂葬焉其後裔果貴顯人稱孝感墓

州志

陳思齊字效卿漳平廩生事父母盡孝既歿哀毀踰禮鬚髮盡白又負土石營塚常有甘露降靈芝生結廬墓側弗忍去遂家焉服闋應貢以祿養弗逮

辭鄉人稱曰陳孝子

州志

鄧邦佐龍巖人素行淳樸會母病篤禱於神夜夢神告以割股肉燄之可愈遂如其言以進母病果愈



州志

國朝

邱翹樵字穀之龍巖人好義樂施會龍津橋圯編木橋以濟民咸賴之歲久復圯順治丁酉知縣王有容興建石橋翹樵捐金倡助橋賴以成州志

倪著字太微龍巖庠生尚義俠嘗嚼指血作書勸族人重建祖祠見貧不能殮者輒施以棺又為里中請豁夫役里人立碑記之順治乙未寇警倡捐輸餉按君學使義之均匾旌焉州志

揚範字衍洛龍巖人弱冠首拔郡庠後隨父往漳應

試遇山寇夜劫其父去範乃盡變產業借兵壯為援親入賊營贖父歸逮耿逆叛督師姚啓聖延入幕府叅機密欲授以武職辭乃委任漳郡訓導教士有方所賞識皆成大器州志

曹光伯寧洋人康熙甲寅寇入城居民驚走光伯父有足疾不能避遣光伯謀自存光伯守父不去遂被執寇詢而義之戒勿殺並得免時光伯年甫十七耳至父母生事死葬俱能承志盡禮撫兄弟子如已子人稱孝友州志

石介木龍巖人少孤隨母醮於楊繼父楊聰美失足



墮水介木即赴水救甫趕及父身灘高水溜順流  
下遂同死續傳

陳天達字可行漳平縣學生少孤寡甚授徒自給為  
弟妹婚嫁康熙庚戌成進士時年五十九矣甲寅  
耿變攜家入山與其子講明經義耿脅之任不應  
幾得禍丁巳恢復總督姚公啓聖為天達同年友  
將特疏薦之天達以老病固辭日與親友子弟講  
學課文年九十猶手不釋卷與人推誠相與一無  
所飾但非禮不可犯親知顯貴不輕問遺非公事  
未嘗一至郡縣卒年九十二州志

倪元俊字豈凡龍巖監生性樂善巖之南為往漳大  
道嶺路崎嶇遇雨泥濘行人多躓元俊傾囊金自  
孟頭至嶺頂袤十餘里悉燹以石建亭於牛嶺以  
慰焉其他助修橋梁道路賑饑恤貧不勝枚舉續傳

吳卓字濬原寧洋學生弱冠失怙事祖母孝仲分珏  
早逝其婦張氏少寡守孤卓為衣食訓誨得成立  
全節凡宗族姻婭有急無不周恤雖耗家弗顧也  
龍巖陞州後剏建學署文場修學宮重建明倫堂  
築城隄諸大役皆力董之寒暑靡間者三載積勞  
成疾而卒續傳



續志卷五十三終

福建續志卷五十三

文苑一

文生乎心達於著作而操觚握槩厥製攸殊是故古之爲文質而奧後世之文澤而靡此繫乎時者也北學多深蕪而南音要眇此牽乎地者也閩擅東南山川秀鬱之美自唐漸澤風雅宋多名儒仁人之言藹然迄於今

天子文思光被左右獻納論思諸臣陳謨矢音追述作於三代歌頌之聲洋溢海表則所謂時與地胥躋厥盛矣昔東馬鄒枚摛辭漢代後世稱之



鑄在正史范蔚宗創傳文苑執簡者咸取則焉  
况夫方國之紀因文徵獻而廢學士大夫不傳  
其可哉爰續前志論次其人聿有學殫研莫規  
微文鈇大義使宇宙之蘊古今之竒幽者彰日  
月奧者廓天地卓然自鳴垂範不朽此極軌也  
次之則揚聲雲漢黼芾厥華又次則寂寞蓬衡  
枕菲終老要皆克自著作以蘄或傳於當世苟  
非黷費並可兼收至於功德顯聞難以篇章限  
者書之別簡云續文苑志

福州府

宋

謝伯初字景山閩縣人天聖景祐間以詩知名歐陽  
修謫夷陵伯初寄以長韻修稱其佳句無媿唐賢  
而歎其仕宦不偶困窮以卒

閩書

林仲嘉福清人以詩名與鄭俠王聖時林圖南李天  
與相倡和嘗遊京洛有詩三卷回里林子充長於  
性學所著有論語詩五十首指南集二卷詩文二  
卷時鄉有古屯三賢之號謂仲嘉子充也其一不

著其名

閩書

鄭首字晉信福清人強記能文新頒資治通鑑有鬻



於門一夜輒默識之宣和二年年十九魁鄉薦南  
 渡大赦首以赦書示文別撰之鄉人借地架屋首  
 戲答之曰疆土日隘無可借者被訐賜死所著有  
 六經解榕溪集閩書

陳修閩縣人紹興中會試第三人年七十三矣而尙  
 未娶高宗讀其四海想中興之美賦有云葱嶺金  
 堤不日復廣輪之士泰山玉牒何時清封禪之塵  
 手書黏壁及唱名云卿便是陳修問年幾何有幾  
 子修具對詔出內人嫁之閩書

王誼字正仲福清人蘋從子家吳江以學行鳴於時

當出仕秦檜當國忌天下才能誼發憤為罷相對

以刺之為僕所告檜怒貶象州十年乃歸遂不復

仕著春秋類書蘄州府志

李巖起字應求古田人乾道間中特科才高好學為

時輩所推歷任池州總幹乞致仕遂監安南獄廟

丞相周必大優遇之正德府志

鄧林字楚材福清人淳熙五年登第有文名朱熹呂

祖謙陳傅良戴溪皆與為友凡三上書譏切時政

其畧曰今朝廷無元氣中國無生氣士大夫無英

氣故金人客氣擣虛而入陰陽沴氣乘間而起朝



臣忌之授石城丞有虛齋集

萬歷府志

林文昭字宗範福清人有論語解一卷弟文韜字宗

孟文昭能解經而文韜善星數論史記與漢書皆

稱太初元年丁丑歲而二說不同者史記顓頊歷

漢書黃帝歷也所著有歷集

閩書

王楸字勉夫福清人蘋從孫早孤事母母歿以不逮

養不肯預鄉薦所著有野客叢書三十卷巢睫稿

五十卷子德文克世其學德文子教字行父著雲

嶠類要紀事極該博

姑蘓志

元

蔡復初福清人至正間舉明經為書院訓導少從龍

江林梅所余大車學易受書又從惠安盧琦學詩

孝友力義琦卒心喪三年所著有詩銘訓集

閩書

明

鄧定字子靜閩縣人元末兵起定削跡東山以著述

自娛洪武間與兄誠並徵遺逸誠應聘而定固謝

自是刻意聲詩與王恭陳申輩日過從文酒縱遊

山水間著有耕隱集

萬歷府志

陳郊閩縣人能詩善天文與林鴻陳仲完唐泰高棟

唐震王恭鄭定王偁王褒稱閩南十才子洪武三



十年以舉人會試占曰今年榜首當刑而死榜發  
郊第一是榜南士最盛北士訟於朝太祖收考官  
劉三吾并郊下獄固無意殺之會有言郊預知當  
刑者太祖故禁習天文遂誅之閩書  
陳申字孟膚閩縣人博學善文詞與林鴻鄭定諸名  
士相友善洪武間由教授擢潮州知府有惠政人  
稱文章太守

鄭文霖字汝衆長樂人自號耽犁子建文初徵辟不  
仕與王恭諸人相倡和中丞練子寧作耽犁子賦  
贈之縣志

陳全字果之長樂人永樂丙戌進士第二人授翰林  
編修永樂大典書成召赴行在修四書五經性理  
大全事竣陞侍講著有蒙菴集縣志

鄭洪字公量侯官人幼失怙恃能卓然自立刻意古  
學以啓迪後進詩有唐人風致爲文務以理勝不  
事富麗正德府志

林謹夫名樞以字行號如齋閩縣人成化進士授景  
寧知縣擢同知所至有政績生平好學旣老手不  
釋卷嘗修福郡志考斷精密惜未成書所著有如  
齋類稿續稿等集正德府志



傳汝楫字木剡汝舟弟也貧而博學一意詩歌時稱  
二傅咸惜其早卒

林春澤字德敷候官人正德進士授戶部郎謫寧州  
遷肇慶同知寇掠高州檄攝府篆春澤習知徭兵  
害民悉罷遣之代以土著諸寇次第就擒擢南京  
刑部郎出知程蕃府擇耆德文學之士為童子師  
時卧龍金石二司暨通州塞屢年失地春澤謀平  
復功未上為忌者所中調歸春澤少工詩與鄭繼  
之何景明齊名在吉州與羅欽順講學後復師呂  
柝究其旨奧年百有四歲卒

分省人物志

廖世昭字師賢懷安人正德丁丑進士為人體不勝  
衣而攻苦讀書無何夭死同時有郭波字澄卿方  
邦望字表民皆喜為詩波古健學杜而短於才邦  
望平淡學孟而學不足以充之與世昭皆稱名士

萬歷府志

林燧閩縣人有醇行其學涉獵書史著微辭什伍二  
十四卷宇宙名物罔不羅列自成一家言

萬歷府志

祝時泰字與亨候官人嘉靖壬午鄉薦授工部司務  
時泰長於詩法律謹嚴間出奇語必能驚人又善  
與人交後僑寓武林與諸名士結詩社

萬歷府志



鄧原岳字汝高閩縣人身長玉立美鬚髯為文模矩  
秦漢詩以氣格勝而卒歸之盛唐舉萬歷壬辰進

士授戶部郎卒年五十有西樓存稿萬歷府志

商家梅字孟和閩縣人少為詩多才調萬歷末年遊

金陵與鍾惺交一變為幽閒蕭寂不多讀書亦不

事汲古鐵心役腎取給腹笥低眉俯躬目笑手語

無往非詩殆所謂苦吟者也時侯官王毓德陳仲

臻皆苦吟求工知名於世

林子勉字行甫閩縣人萬歷恩貢選長泰訓導轉泉

州府教授相國李廷機稱為金玉君子著易經說

四卷蓬草五卷石溪集八卷子應典字儀廷以貢

選雲和訓導著經史要二十卷古今奇觀十卷宦

遊艸二卷龍門集六卷孫贊卿榮芬俱善詩文葉

高撰傳

齊莊閩縣人家貧嗜學為人夜舂手足搯作而置書

其旁注視之遂通曉無遺以五經為諸生每出筆

根極六經理要情文豐然衡文者無不以國士相

賞著有史論白湖集余甸撰傳

王穎如字哲開閩縣人年十三隨董應舉遊鎮海樓

倣王勃作序頃刻數千言序詩並就極壯麗典則



老於諸生著孝經頌贊及三樓紀勝諸篇

舊府志

陳衍字磐生閩縣人篤學好古與徐燭徐燭相切劘為詩文好談邊事利害及將相大畧窮老盡氣不少衰止著詩賦碑傳雜文四十餘卷子濬字開仲亦有才名

徐英字振烈候官人少豪健儋米為業而折節讀書喜擊劍日晡時步橋上與後生談畫邊制勝之策皆本於司馬法曹學佗曾訪之鏹戶不見歸遇諸途強之至石倉園入社刻其詩於十二代詩選明亡學佗里居殉節英伏尸哀慟自噍其舌噴血數

升死著有鳴劍集

余自撰傳

國朝

許秘字天玉候官人明崇正己卯舉人與新城王尙書士正善士正作慈仁寺雙松歌贈之稱為閩海奇人田髯淵曰天玉詩才敏贍廿年來屢與倡和每拈一韻嘆其絕神其為名流推挹如此後官安定知縣著有鐵堂集

府志

梁珪字至鉉號雪園長樂諸生年十五食餼詩文能作驚人語為知縣夏允彝所器重梁氏累代讀書為名諸生此蓋第九世矣後恣遊南北著有江南



遊草江西遊草楚遊草雪園詩集子若孫俱為庠生縣志

林榮芬閩縣人子勉孫順治辛卯舉人官翰林院待詔著有如蘭稿子日毅博雅工詩著有浪谷集舊通志

葉矯然字子肅閩縣人順治壬辰進士宰樂亭縣罷歸康熙辛卯重宴鹿鳴

聖祖念科甲舊臣 詔與王尚書士正等六人復還原職年九十六卒著有易史易經滙彙筆印四經學筆印理學史學古文學龍性堂集諧際詩文集子聲

遠乾隆壬午舉人府志

陳曉字德燭長樂人少有至性五歲授書過目成誦長更搜研六經箋註多所自得康熙己酉舉於鄉兩上春官不第卒於京邸年僅三十六生平孝友端謹手不釋卷著有詩經串解書經串解共九卷

陳氏家傳

黃鷺來字叔威閩縣人性豪邁不羈文名籍甚一試鄉闈不售遂棄去遊京師京師名流談經濟稽典故論理學衡文章者必以叔威為歸叔威雅量容納久而無倦卒不遇而以齟齬終乃一洩於詩以



傳其不得已之懷抱詩格在元白蘇陸間著有友

鷗堂集八卷 費錫璜詩序

金潮字海門候官人康熙辛未進士選庶吉士改知

崑山縣清介自持豪強斂迹以呈誤解職潮少遭

家難盡室播遷以出繼得免刻苦力學雖通仕籍

多悲痛愁苦之音父卒得贖其母與弟歸中歲流

落吳下四十年授徒自給年八十餘歸里卒著有

海翁集玉山草堂詩鈔 府志

許遇字不棄候官人受詩於新城王士正得其宗派

兼工松梅竹石士正嘗題其畫竹云許侯磊落負

奇氣平生節目堅蒼篔石林手種竹萬个興來自

寫千篔簹選授陳留知縣調長洲新滄浪亭公餘

禮士大夫倡酌其中風流文彩照映一時卒於官

著有紫籐花菴詩集子鼎字伯調雍正癸卯舉人

著有梅巖集 府志

張遠字超然候官人幼孤力學避耿逆亂遊常熟為

何氏贅婿遂家焉詩文書翰匠心獨運有遙情逸

氣康熙己卯鄉試第一授雲南祿豐知縣卒於官

著有无悶堂集四十卷 昭文縣志

林佶字吉人號鹿原候官人受業於汪編修琬拔貢



入成均受詩於王尙書士正時王司農鴻緒總裁  
明史延佑與鄞縣萬斯同商訂編輯康熙己卯舉  
於鄉丙戌特旨入直 武英殿抄寫 御製詩文  
集壬辰 欽賜進士第一官內閣中書舍人分纂  
詩經傳說彙纂子史菁華陳相國廷敬徐司寇乾  
學宋冢宰犖先後推轂家多藏書乾學刻通志堂  
經解朱檢討葵尊選明詩綜皆就傳抄佑博覽羣  
書爲文尤得力於韓曾著有樸學齋詩文集潘檢  
討未爲之序又焦山古鼎詩甘泉宮瓦詩各一卷  
刻於昭代叢書性喜金石工篆隸行楷子正青字

洙雲以廩貢應薦辟授刑部山西司學習行走判  
決疑獄如神後改淮南小海場大使清課餉興學  
校所治感焉以母老告歸卒正青少爲諸生張中  
丞伯行選入鼇峰書院名籍甚歸復預修福州府  
志著有辦香堂詩文集榕海舊聞榕海詩話小海  
場志在峩字涪雲博雅好古工文詞書翰與修古  
今圖書集成例叙知縣乾隆初元大學士趙國麟  
將薦之會罷不果著有陶觴集硯史玉衡字涇雲  
國子生亦世其家孫牲擎天諸生有文名府志參家傳  
藍漣字公猗候官人父籀字興漢善篆隸書漣博物



洽聞工諸體詩篆草八分皆有父風兼擅繪事性  
喜遊足跡遍齊魯衛魏吳越在粵東尤久與陳恭  
尹梁佩蘭交善所著有采飲集府志

張崙字子捷號蒼嶠作詩渾古善於學杜林從直謂

讀其詩如入寶山日不暇給嘗客諸公墓府多所

擘畫後以候官監生奏授淮安中河通判著有晚

香堂詩集十二卷子鶴年鶴佺皆善詩有張後槎

隨見錄洞三詩稿閩詩選小傳

陳潤字肅雨連江人負雋才弱冠試輒冠其儕巡撫

張伯行學使汪薇沈涵皆器重之時勤著述晚貢

於鄉益治儒書有四書詩春秋河洛諸辨疑及雜

著大旨要於羽翼傳疏縣志

林衡原名璣字義儒閩縣諸生榮芬孫工詩古文辭

性孝而勇於為義閩令撻諸生於堂衡憤其冤率

同學籲憲司求理以此除名後入縣庠改今名著

有四書講義全宋詩注鳴書竹窓筆記博古草廬

詩文集共一百七十卷子從直乾隆甲子舉人亦

工詩府志

林緒光字廣業康熙己卯舉人知蘄水縣補平湖遷

冀州知州以前任事鐫職七年事白復補海寧縣



轉乍浦同知遷永北知府以艱歸再赴補卒於途  
緒光性强幹興利除弊所至有聲拂拭人才喜爲  
寒峻開路士林重之惜未竟其用長於詩著有餘  
齋集闡中雜咏府志

陳仁字惕存閩縣人康熙乙酉舉人德性凝定以文  
章振一時苦學授徒供奉二親又爲業師營葬著  
有鐵硯齋集府志

張煒字彤伯候官人康熙戊戌進士選庶常散館授  
編修充三朝國史館纂修官以勤慎著改刑部  
郎中多所平反尋致仕歸家無儋石聚徒講學以

給馬煒性孝友好誘掖後進雅善詩賦古文辭著  
作甚富有雪樵詩文集若干卷子文城掖縣知縣  
岳已酉舉人恭城知縣府志

吳文煥字觀侯候官人康熙甲午以五經舉於鄉辛  
丑進士第二人授編修請假家居以詩酒自娛者  
二十年後補刑部員外郎調禮部擢監察御史告  
歸家貧四壁蕭然文煥處之晏如卒於家詩有唐  
賢風調同里鄭三才字廷贊與文煥中表兄弟居  
相隣近少同硯席其詩踔厲風發康熙癸巳成進  
士知東光縣政暇以風雅教其邑人丁艱服闋補



上元縣卽歸晚歲艱難與文煥同著有參亭詩集

李開葉字奕夫士亮子福清人少聰穎善學親歿躬

營葬事盡哀盡禮康熙辛丑進士選庶吉士

廟登極特命需次銓曹是時輔政隆公領吏部

事重其名欲羅致之開葉落落不就也引疾歸既

歸口危坐小亭纂輯濂洛關閩諸書以授徒訓子

姪好友過從唯以講學論文為事偶形之於詩皆

自胸襟中流出有不盡之意所著有崇雅堂詩鈔

儀禮輯要教學源流論語論文各若干卷子良樂

時憲鳴嶠並登科第孫光雲玉驄諸生能文章

劉敬與字隣初福清人孝友而肆力於學研究經史

雍正癸卯成進士授庶吉士改行人司親老乞歸

侍養十六年生事葬祭盡誠盡禮服闋就職而恬

於榮利未幾又乞假歸當事聘修省志偕謝道承

為總裁棄取裁奪悉當公慎不阿既藏事延主鰲

峰講席訓諸生讀書敦行所識拔皆雋才尋以憂

辭去杜門課子敬與問學淹貫言理宗程朱言詩

法漢魏視世俗餽飭訓詁之學弗屑也著易經解

困愚齋諸集

黃任撰傳



郭美字謙居閩縣人原籍福清氣質端重而勤學六經子史諸家靡不手錄未冠補諸生巡撫張清恪公伯行愛其詩古文辭器重之雍正癸卯成進士聞文贈衆人口知邢臺縣詢民疾苦賑荒斷獄悉公而明不使胥吏上下其手修文廟以振士習造普濟堂以恤孤貧在任八年吏畏民懷丁母憂歸囊橐蕭然以未親視飯含爲憾哀毀骨立遂致疾而卒美孝於親友於兄弟坦懷樂易爲文皆根柢經史著有雪泥鴻爪秦蜀遊草藏於家

盧觀源撰傳

吳履泰字文岍號茹原候官人少爲文有奇氣弱冠

補弟子員家貧以束修供養雍正丙午鄉薦庚戌成進士選庶吉士授編修尋擢侍講歷侍讀學士丁母艱服闋抵都復以疾假旋時子憲青方令桐廬養病官舍邑有桐江書院每朔望必親與書生辯論義理考覆文藝士喜得師旣歸主道山書院講席傲鷺湖白鹿規條訓飭諸生旋卒門人沈尙書德潛志其墓履泰性情和厚氣宇溫純爲諸生時常貸人薪米旣貴召其人或其子弟加息償之其人或不能記憶強令受之隣女王年已笄婿遠遊母死無依履泰以母命促婿回罄館金飲其昏



塾師高某之孫流離遠方遍訪得之為覓回以接  
嗣續更為師卜葬地著有儒先纂要少箬詩集培

蘭堂文稿歸愚文鈔

吳于岸字太士閩縣諸生性耿介不隨俗俯仰與親

故游處未嘗一言涉諸諛盛暑集生徒談經必正

衣冠以是人皆敬之工制舉業而未售學使曾枉

過其門欲以賢良應詔辭不就時以為難節家傳

吳濂字元吉福清人雍正癸丑進士授山西偏關知

縣濂曾受學於巡撫張伯行學行淵粹著有竦筆

軒詩鈔玉柱軒詩領古文鈔滿籟金前集縣志

林其茂字文竹閩縣人少穎悟博文強記乾隆丙辰

進士知山陰縣邑濱海多水患其茂築塘濬濠修

葺山書院建義學繕城垣治行稱最以失察鐫級

歸卒年三十著有鷺音集山陰集子喬蔭澍蕃俱

庠生府志

張萬年字進玉侯官人事母以孝聞性嗜學淹貫經

史教授生徒名宿多出其門以貢授海澄訓導著

有學庸奧義春風樓遺藁府志

郭植字于岸古田人乾隆壬戌進士主菴峰講席廣

東聘主粵秀書院七年粵人尊信之著有經史問



月坡詩集植聞見該洽於詩尤工嘗輯本朝諸家為詩畧數十卷藏於家府志

吳鵬南字茂今號芝岡連江人父樹稷孝友篤學善課子鵬南讀書過目成誦九歲能屬文乾隆壬戌進士入翰林散館授編修癸酉典試浙江稱為得人改御史條陳水利及裁種疏

上俱是之擢吏科給事中以父艱歸哀毀成疾卒生平惇謹事親以孝聞立朝多所建白著有習靜軒詩文集

張捷春字天侯號西峰閩縣人自幼窮經勵志文法

八家字倣右軍不屑為世俗之學入鼇峰受業為

蔡文勤公世遠器重手書語類勉之及子甄陶入

翰林改知縣歷任鶴山新會揭陽昆明多善政皆

秉庭訓也姓好施與嘗贍友朋之急乾隆丁卯舉

於鄉羣為主司慶得耆碩張氏家傳

楊鳳騰字奎曉連江人少從祖父口授綱鑑及諸名

家古文乾隆丙子舉鄉試第一丁丑成進士授廣

西賀縣令以文學飾吏治惠政大行已卯庚辰兩

與鄉闈同考所拔皆知名士生平孝友工文著有

詩文集辛巳卒於官子鍾嶽辛巳進士亦能文家節



傳

鄭際熙字大純號浩波乾隆丙子鄉薦幼失恃哀毀逾成人涉獵經史百家詩文根柢湛深家貧僦居舅氏荒園斗米錢三百際熙持書向市得錢卽糴米歸奉父而自與妻子雜薯蕷糠粃充腸父終弗知也隣有吳茂水死際熙為殯之并衣其母公車抵蘇州同鄉林孝廉中塗得狂疾以詆訶長官被逮際熙留蘓親理藥餌并曲盡厮僕之役病間百計援解事得釋而試已後期留都五載而歸卒年三十六著有易朔杜律篇法詩文集鄭氏家傳

興化府

宋

薛巒字山甫仙遊人太祖平江南詔仕李煜者悉與故官巒辭不就刻意力學第太平興國進士累官殿中丞丐歸疏云竊欲歸讀未讀之書以終天年著有論語解邊功十論等書縣志

方惟深字子通父龜年景祐進士著有經史解題羣書新語卒葬姑蘓惟深因家焉舉進士不第晚為興化軍助教王安石愛其詩謂為精詣警絕閩書傅諒友字冲益天性恬淡自六經諸子百家及浮屠



黃老之書無所不讀登元祐進士歷膳部員外郎  
知利州善詩文有冰廳文集縣志

徐壽仁字子由師仁弟天資曠達讀書追古尤長於  
詩屢試不售遂束書遊四方遇佳山水極興乃返

晚就所居築坡種菊自號菊坡陳俊卿梁克家王  
十朋皆有詠贊年八十餘卒縣志

陳堯道字敬之仙遊人端平進士歷官殿中侍御史  
至右諫議大夫以忤權相致仕歸卜築東湖日以  
詩酒自娛著大學中庸說及平湖文集縣志

元

郭完字維貞仙遊人言行周謹工古詩近體絕似薛  
能許渾至正時隱於壺山與方時舉為詩文會縣志

明

伍衡字時敏莆田人學博氣淳工古文及詩時出新  
意歌行麗縉奇崛有溫庭筠李長吉風律詩充贍  
華美洪武初薦為增城知縣縣志

周瑩字次玉莆田人有文名正統進士歷撫州知府  
莆詩學自瑩振之力擬復古居官不廢吟咏有郡

齋新稿閩書

李廷梧字仲陽莆田人經術絕工宏治中進士授桐



鄉令吏治精敏入爲監察御史歷大理寺丞案牘之暇卽肆力於文章閒居徜徉山水間爲詩歌自娛鄭司馬岳尤重之

縣志

陳所有字彥冲莆田人嘉靖丙午鄉薦授合浦知縣性簡傲以詩歌自豪精行草書每自署其號曰四樓會直指使者按粵令作字署四樓以進拂直指意所有退而笑曰筆墨事按君乃視爲縣奏記卽遂歸有秉燭堂稿

縣志

方興邦字懋藩莆田人常以古文詞聲律受學於舅林萬潮庚子鄉薦授上海教諭後爲吏禮兩部司

務與廣陵宗臣爲同舍郎嘗作百花洲歌贈之有

青蓮風歷廣西叅議著有喬村集

縣志

柯茂竹字堯叟莆田人維騏孫少穎敏登萬歷進士授海陽知縣有善政退把圖史夙善病復以勤事

卒著有柯論柯亭詩文初稿

縣志

余颺字賡之莆田人崇正進士其制義與同年夏允

彝陳子龍齊名宰宣城積案一清巳卯分校鄉闈所取如上亦臨方以智皆知名士未幾賦歸杜門

著書有蘆中詩文集蘆蠟史論識小錄

縣志

葉甲字白生莆田人崇正中鄉薦平生博學好古著



有師石堂稿時有方綜字章焱嘗於三山與弟鏘

字八公集八郡名士結西湖社後以父喪廬墓卒

有紅琉璃集

縣志

林說字傅公莆田人為人恬淡無競篤嗜經史舉崇

正鄉薦敝衣徒步遇山水友朋樂處往往托詩見

志甲申後挈家入深山絕粒死著有寸艸堂集

縣志

林崑字小眉莆田人登崇正進士所作制義奇逸詩

原本漢魏於唐獨宗李白外此夷然不屑也甲申

李自成犯闕崑問道渡江上書閣部史可法首言

賊中事甚悉可法奏留之崑磊落負奇節既登第

欲自表見會時事已非乃益肆力於詩所作多悲

憤語後賦絕命辭三章嘔血數升卒崑以詩文殉

君父以性命殉詩文著有螭螭集十二卷

縣志

國朝

余懷字澹心莆田人博學工詩詞北遊建康賦金陵

懷古詩一時名流傳誦謂不減唐劉賓客

漁洋詩話

吳士燧字仲初莆田人嗜學好歌詩自漢魏而上無

所不窺康熙丁卯舉人屢上春官足跡所經蒐探

感觸輒寄之詩古文辭知扶溝縣有政聲三年解

組歸偕同好以筆墨娛老著瀾齋詩文集

縣志



林丙春字叔疇莆田人嗜古力學凡天人理數象緯律呂之書靡弗究詩文俱從肺腑流出著四書集解禮記纂要周易尙書叅校硯山集同時黃軾黃轍兄弟俱工詩古文詞與丙春齊名

縣志

鄭得來字光兩號墨愚仙遊人幼聰穎侍御林蘭友目爲不凡工詩文著有愚齋集荔林詩集薪書譜系助餘草連江里志

縣志

林鳴球歲貢生仙遊人篤學工文於後進多所培植康熙癸酉鄉試主司孫勳已拔第一以他故不售爲惋惜曰鳴球可謂數竒序其文以行世痛其

死賊難對人言未嘗不慟學者擬之晉王裒云

縣志

姚黃甲字叔度莆田人天姿高邁寢食古大家癸酉孫勳典試黃甲以文贊稱爲國士戊子舉於鄉司諭平和遠近負笈踵至所著有詹詹草

縣志

林元之字又儼莆田人郡守許煥試士見所作聽彈

湘妃怨詩嘆爲何大復明月篇當不是過元之綽有儁才攻聲律尤善壎詞倚聲按拍至百餘調徐檢討鈞周叅軍在浚見而序之謂在秦黃周柳間

著有香艸詩文詞集

縣志

朱朗字斯荀讀書過目成誦名噪海內康熙乙未進



士任密縣有惠政旋改建寧教授訓迪多方文風  
丕振著訓蒙家課初學宗之縣志

彭帝時字敬夫號梅川康熙庚子舉人博學工詩遠  
方從遊者戶外屢滿著有詩經演義縣志

嚴光漢字丹斯仙遊庠士十歲能文筆墨町畦之外  
別有懷思賦性磊落灑脫尤豪於酒著鞞園錄草

草亭詩集自怡外篇縣志

俞荔字碩卿莆田人雍正甲辰鄉薦第一聯捷進士  
授廣東長寧縣下車卻鹽鐵錫鑪商人饋送百餘  
金不受尋委署連平州興利革弊盛有政聲歸田

行李蕭然奉母至孝結茅南谿授徒講學著有詩

文集若干卷縣志

廖必琦字師韓號愧荆莆田人爲諸生時以孝聞登

雍正甲辰進士初授主事以陪奏改翰林院庶吉

士授檢討入直武英殿遷浙江道監察御史多

所建明未幾假歸居莆之龍泉其地多植荔因自

號曰荔莊杜門謝客不預外事人稱其清操年八

十卒著有荔莊詩鈔莆田縣志黃任撰傳

顏岱字廣伯仙遊人性岸異過人好讀書家貧不能

自置遇藏書家必借盡讀乃還尤好宋儒家言贊



穿融徹雍正壬子舉於鄉著有青巖集

縣志

吳孫逢字開吉莆田人為文一出性靈不襲人牙後

語乾隆丙辰成進士授車駕司主事歷刑部安徽

司員外郎以疾歸行篋蕭然家居仍理故業著有

春秋管見測義及桂林閣詩文集

縣志

鄭帝眷字秩公莆田人文炳子性穎敏而誠懇游庠

食餼試屢冠其曹文名藉甚而於孝友尤篤凡得

修脯輒供二人甘旨親疾刲股以療與兄上仁共

行善事乾隆庚午舉於鄉土司金德瑛亟稱之未

會試而卒聞者惜之著有經史彙珠勸善書

縣志

福建續志卷五十四

文苑二

泉州府

宋

鄭褒字成之惠安人宋初承五代後文格卑弱褒力

去浮華直追古作者咸平元年登第未命下卒有

集十卷行世蔡襄論閩中文章自歐陽詹後惟推

褒云

府志

江致堯字聖俞惠安人少用力於六經以特奏任法

曹官務煩冗而丹鉛不輟有周禮解及詩集

府志



會慥字端伯晉江人初為尚書郎直寶文閣奉祠博學能詩居銀峰集百家之說類纂成書可以資治體助名教廣聞見供笑談凡六百餘種府志

陳景溫字子實晉江人淳熙間列上庠詞賦擅名弱

冠入京補試以大衍天地之樞為題景溫講析四

象要義甚詳應試者皆來授指以內舍生卒同郡

林冠英高仲魏奕士明陳世仁仁卿陳時中子周

許國光潛仲王照復成之等皆與景溫同時知名

府志

許衍同安人隱居苦學博通經傳子史編田舍墨記

四十卷府志

元

趙希直晉江人宋宗室里第藏書贏於巷市悉遍讀

之尤以善詩聞張以寧稱其短章清妍妥造長篇

滔滔汨汨簡斷而思溢人不足口獨多也府志

明

陳亦言字汝納晉江人元至正間自古田侍父來官

泃州鹽場因家馬刻苦力學貫穿經傳子史詩賦

尤工洪武初不樂仕進著有潛齋集府志

劉嵩字子中晉江人博通經史所為詩文清新奇古



不俟思索人謂其有謫仙才洪武初以賢良方正  
薦授廣西賓州判官卒泉名士多出其門著有中

齋集府志

楊曜宗字世顯晉江人幼聰警經史百氏靡不博涉

洪武中以明經薦授晉江訓導擢韓府紀善遷左

右長史輔獻恭二王以禮為文溫潤典則詩清暢

麗密學者稱思復先生有桐月山房稿府志

郭廬字居賢以字行晉江人治壁經學博今古而磊

落多奇節洪武丁卯鄉薦授淦川臨武教諭詩平

淡古雅中復慷慨雄渾胡儼稱為逸才有淦川遺

稿府志

溫良字元吉晉江人學問該洽工晉唐書法正統中

舉於鄉授中書舍人預修宋元綱鑑一統志英宗

實錄李東陽稱其書法有李北海趙文敏之風舊志

參願  
學編

莊鵬字萬里惠安人成化丙午舉人授新寧教諭議

經術考古制釐正文字程式以變易學者習尚鵬

獨居一室黜勘書史雖分注小字亦備精細作為

文閱麗可喜縱橫穿貫莫窮其辨有遺稿藏於家

閩書參小  
山類稿



林鴻儒字允德惠安人祖光有隱德父密以孝聞鴻儒亦善事父母治尚書專其經著有尚書目錄治書者宗其說王慎中奇其文以通於唐順之唐亦驚異與定交

府志

朱梧字子棐晉江人嘉靖丁酉舉於鄉力學而尤長於詩就職博士遷楚令行潔而材迂遂罷歸徧閱唐人詩手抄口語結為詩社嘯咏往來不絕其詩與山人陳鷗江一鯉于宗亮朱汶詩彙刻王慎中

序之

府志

朱汶號碧潭晉江人以名家子少從父薄遊歷覽名

勝退學詩屋壁戶牖題墨皆滿一日郡守出訪汶

燒筍煮茗以飲於是泉人乃知有朱詩人

閩書

江一鯉號草塘晉江人倜儻喜談孫吳豪氣過人盡

傾一座既與朱汶于宗亮等結社格調清越音節

鏘然而無矯舉匡拂之意陳鷗號忘機于宗亮字

○○皆豪宕工為詩與一鯉友善名與之埒

閩書

張騫字仲士惠安人岳次子少淹貫如宿學文思波湧嘉靖末祭酒陳廷敬試冠六館士秋試主司林爓讀其五策置前矛後知為襄惠家兒喜曰三篋之風不墜矣所著有論史存半稿

府志



郭文煥字仲實晉江人嘉靖歲貢授高安訓導自少  
究心理學四書易經太極通書正蒙俱有註釋間  
或發蔡清所未發讀史別出論斷四書學庸口義  
成於林希元存疑未出之前論議多昭合者府志  
張鳳徵字舜夫號治庭同安人而穎敏襁褓中輒  
能識壁上字九歲通五經大義嘉靖乙丑進士觀  
政御史臺病卒子繼桂萬歷乙未進士仕華亭松  
陽知縣清白堂稿  
鄭昭字養晦惠安人博學嗜古為詩文與衍成家著  
有小園抱甕錄蠹木賦何喬遠刻入文徵又作桃

源行落落五百餘言清真簡遠超然塵壒之外

家課子有處世寧須辭爵祿立身全賴有詩書之

句徐氏筆精

周良宰字以制號肖慙晉江人泉故多習易少治戴  
經者良宰獨以是名家所從授經者莫不博科第  
去若何喬遷其一也良宰授弟子經三場兼通不

顓制義何鏡山文集

何喬遷字齊孝晉江人與弟儀部喬遠世其父炯學  
同習戴經初治博士有聲最後攻古文辭峻潔典  
亮矩矱歐會萬歷丙子舉於鄉授建陽教諭歷大



理評事多所平反卒之日篋無十金府志

郭偉字洙源晉江人髫歲以文學名萬歷初李廷機

諸人爲紫雲會偉與焉纂鰲頭龍翔集註并集註

發明衍義真銓珠璣歸正抄評正宗共八種海內

家傳戶誦繼而流寓金陵撰崇正錄名公答問等

書三十七種最後成集註全書年七十餘卒府志

留湛然字敦照號鑑泉晉江人宋忠宣公正之後舉

萬歷鄉試資不敏而善強記一經腹笥永如自閱

至嘯思屬筆則劃然心開藻麗旁溢卽宿儒謝弗

逮

黃志清字以度號鷺峰晉江人父錫知鄧州志清年

十四見知於督學胡定萬歷中成進士選翰林院

庶吉士授編修益沉酣經史殫精義易及館選後

又旁通天文地輿日歷術數年三十六卒於京閩書

系何鏡山集

洪猷字文振號積齋晉江人家貧力學授徒取陳真

晟心圖蔡清密箴爲士誦之解咸艮二卦謂艮者

止也君子思不出其位則靜而非虛矣咸者感也

君子虛以受人則動而非實矣萬歷十七年應貢

授南安訓導時以講藝中指點身心性學閩書叅雲臺藏



稿

陳鏐字巽卿號斗山惠安人嗜古文詞稽核典故邑中戶口賦役關堡阨塞原隰高下之等衣食制作之原瞭若指掌領萬歷鄉薦會大司農檄丈天下田賦鏐言於令曰官吏行清丈而民滋累但以一二虛數分配百千里田之家所賠不過錙銖而騷擾之費詭射之弊無復為民困者於是均賦止丈民太稱便著有詩文集若干卷子廉萬歷進士廣東按察使

採霞樓藏稿

林如源字維清晉江人少孤勵志好學長構五因別

業讀書其中自十三經二十一史以迨諸子百家

博聞強識孜孜不倦所著有綱目集要史評八閩

名山川誌掇名誌五因閒鈔何司徒佳話諸書凡

十餘種精於詩賦人呼為五因先生

府志

蔣煝字晦之晉江人相國德璟次子三歲誦唐詩數

十首四歲遍讀四書以次讀詩書諸經覽父架上

子史輒曉大意八歲能文九歲作武王周公桀紂

諸論多翻古案十歲從父北征遇景輒咏十一策

魏璫必敗曰此豎極橫丙寅丁卯敗立至矣魏果

以是秋磔死及長喜讀易及太元譚理出人意表



復究心理學以王文爲師秋赴省試感寒疾而卒  
僅十九耳有遺集名童真子集

節冕  
巖集

國朝

阮旻錫字疇生爲明功臣某之後從峽江曾櫻遊傳  
心性之學又講習風雅旁及道藏釋典諸子百家  
兵法戰陣醫卜方伎之書無不博洽淹貫鼎革後  
棄舉子業遊歷吳越齊魯燕趙以詩自娛學者稱  
輪山先生著有存稿

府志

李登卿字得御南安諸生幼以文受知於何鏡山郡  
中開任仁穎社皆以登卿領袖從者雲集著有詹

詹言及勵行語錄

府志

傅爲霖字石漪號晦三南安人明會元夏器之後由  
海上納款制軍姚啓聖頗得其力爲霖能文工詩  
初授松江府通判卽攜其祖夏器錦泉集與太倉  
吳偉業松江周茂源校梓之爲詩有秀骨逸氣饒  
於藻而沉於思著有賜谷文集別集

府志

陳允錫字子帥號疊齋晉江人善讀書五經子史詩  
文靡不淹貫順治乙未以人才舉試一等授德化  
教諭改扶風縣丞流寇掠邑允錫朗誦衙齋寇問  
何以不去曰吾爲朝廷吏與城存亡去將何之寇



奇而去歷官布政司都事以文名聘修志書如鳳  
翔府志江西通志皆出其手久仕閒曹益肆力於  
經史詩文有十三經解二十一史緯諸子鈔古今  
詩刪古今文選疊齋集皆膾炙人口遷平湖令乞

休歸

陳介石撰志  
參陳氏家傳

李兆慶字賴甫號惟念安溪人兄弟六人皆力學著  
聲兆慶性至孝尤篤嗜正學屬文不拘繩尺而淹  
博宏深順治乙未全家陷賊中仲兄日燦募死士  
擊賊數戰賊窮促走兆慶及家屬得脫於難歸後  
鍵戶掃却課子弟讀書平生踐履篤實與前賢理

學術錄默相契合子光地大學士

府志

學術字徵若號少魯惠安人中順治間副榜選奉  
寧教諭未仕而卒學衡少學制藝宗震川荆川詩  
歌古文得力於杜陵昌黎李光地讀其詩歎賞不  
置又云以真學術名世不徒在詩文間

府志

黃志瑛字曾韞號玉齋晉江人康熙癸丑進士綜覽  
羣經尤工書法授內閣中書舍人詔制誥勅多出  
其手下直卽手一編不輟所選唐宋文韓詩爲後

學津梁著有留耕堂集得閒堂詩集

黃氏家傳

莊延祐字素思安溪人康熙己未進士選庶常奉



旨編纂十六國史以病歸郡士以文就正多所造

就府志

李日燧字性甫安溪人幼卓犖其學長於史書自春秋內外傳司馬氏而下兩漢南北朝史及涑水通鑑皆能熟識默誦而屈指其興廢成敗順治乙未家陷於賊兄日燦見賊魁請傾家貲以贖魁佯許之而窮以力所不能日燦曰此非可以情理邀也夜與兄私視賊壘巖壑形勢曰此守衛羸弱可奪令其兄懸崖出鳩鄉眾夜搗賊巢而脫全家於難後絕意仕進優游田里族黨推為典型府志

何龍文字信周號夙菴晉江人康熙戊辰進士授庶

吉士未第教諭長泰遷汀州府教授修泮宮條學

規士人多所獎拔既館選乞歸營葬以疾卒著有

春星草堂集

何氏家傳

富中琰字韜上號鮮生晉江人禮部侍郎鴻基子自

幼力學凡經史諸子百家及山川輿圖方物之書

靡不淹貫年二十遊庠甲寅遭兵亂亟負母逃亂

妻牽衣求攜竟絕裾走居喪悉遵古禮三年不飲

酒食肉處內由教習選大姚令尋擢遼陽州牧以

病告歸官橐蕭然著杜詩集解自著臬羹集燕遊



草晚年又著等韻一書府志

蔡震升字詔青晉江人康熙庚午舉人少負奇姿詩文有六朝中晚唐風致新城王尚書士正稱為天才泉帥張雲翼及同里施侯琅延為上客時與侯官林佶同安阮旻錫之子允讓著有理氣漫言事行卑論二書蔡氏家傳

張贊宗字子參同安人家政推兄主之兄歿推嫂姪皆不問出入而不私一錢尺布惟慕古好學為詩文奇思偉論能獨出手眼陳元孝唐海門有酷肖子長並駕錢劉之日年七十三卒著有史評詠古

虎若齋前後編餘狂井桃蠲音詞等集府志

李鍾倫字世得號菜園光地長子性至孝幼治經史性理旁及子史熟貫而析其義復從其叔父光坡治三禮於周官戴記尤盡心焉康熙癸酉舉於鄉卒年四十四居常持身謙退而志氣卓然於古人書務欲窮極幽渺嘗云人於苦處不能尋味如何於樂處有得著有周官纂訓數十卷三禮儀制歌訣一卷四書節記一卷府志

陳夢球字二受同安人以旗籍登康熙甲戌進士擢翰林院編修扈蹕南巡屢蒙褒許著有詩文集



府志

黃彥標字樹之惠安人有文名又精繪事得宋元逸

趣康熙甲戌進士士大夫入閩爭索其畫趾相錯

其聲與吾野山人同府志

林之濬號象湖惠安人康熙丙戌進士選庶吉士授

編修嗜古博學詩古文典雅贍蒸著聲南北著有

西村詩文集府志

潘鼎珪字子登安溪人康熙間遊臺灣入庠而歸籍

泉州鼎珪天材明敏下筆千言嘗遊交趾著安南

紀遊與嶺南陳元孝尤號知交為序其集著詩文

二十餘卷府志

林霍字子濩同安人博學工詩究心等韻之學著述

頗富遊意林壑有蒼湄詩集雙聲譜行世府志

施世騷字文迦晉江人琅第五子少有才思能為詩

歌授府貳不赴琅隸京籍疏請世騷留閩闢城東

園有亭臺花木日與郡士大夫為文酒之讌著有

東園詩集府志

李光北字上卿日烜四子康熙舉人福清教諭盡心

春秋內外傳著有春王正月辨論伏窓詩集府志

何維嶽字禮宗號任齋晉江人康熙戊子舉人詩歌



詞賦自成一家事父母至孝父歿官舍扶櫬歸每  
夜獨宿舍外以守哀感行路又嘗脫宗族親串之  
難汀州邱嘉穗稱其至性厚德著有任齋詩文集

何氏  
家傳

李鍾旺字世蕢安溪人康熙戊子舉人侍世父光地  
聞讀書之要潛心於濂洛關閩諸書薦充性理精  
義館纂修考授中書舍人卒著有憶訓錄重申錄  
周官劄記諸經雜解及詩賦古文詞等集府志

李鍾佐字世諧安溪人年十三從父光地居京師為  
文以進張文貞公玉書大奇之曰吾畏友也弱冠

遊庠能極思奧解凡西土所傳歷法及幾何數法

指陳根裔萬支千湊不可胚胎無不冥悟子清植

官禮部侍郎府志

李鍾僑字世份號仰亭安溪人天性孝友嗜學善屬

文康熙壬辰進士授翰林院編修杜門數十年恬

澹自若督學江右惟誘進人士以經訓實學為務

會按察使李蘭咨革生員鍾僑難之李密以姑息

劾改補國子監丞公暇修輯舊學所著有論孟講

蒙詩經測義尚書典謨周禮天官易說等書鍾僑

內行純篤在江西以所得俸餘立宗祠宗人有以



居屋售者諸子已與訂約鍾僑聞之立還其券而不徵其直曰吾不忍也子清載清江清芳俱世其學清載雍正庚戌進士○○知府清芳乾隆丙辰進士由翰林歷兵部侍郎府志

世拱顯字爾韜號小山康熙癸巳舉人九歲能文弱冠安溪李光坡延之所纂十三經註疏多互相參訂詩詞古文卓然名家後授永定教諭以老疾辭著四書管窺詩經輯要詩文集世氏家傳

李天寵字世來號鑑堂安溪人勵節搽遂於經學康熙乙未進士授庶吉士擢編修在史館二十年與

弟鍾僑以氣節學問相高鍾僑歿於京護其喪歸以著書講道為業疏注六經子清時乾隆壬戌進士入翰林山東運河兵備道府志黃夢琳字球卿晉江人邑諸生性清介好學少得吳喬詩法古今體彷彿中晚唐著有雪舟詩集詩學

正宗黃氏世係紀

李清濬字信侯安溪人祖光地命受業於徐用錫何焯學博而醇康熙丁酉舉人授定南知縣丁母艱服闋薦舉博學宏詞復補興國縣決獄平允以勞卒清濬為文踔厲風發汎涉經史子集百家釋典



於歷代典章制度沿革莫不切究尤精於音學書法所著有經史新記壁經梅書辨贗詩文等集府志

楊廷勳本名廷選字青仲號仙洲晉江人康熙辛丑進士選庶吉士授編修充四朝國史館纂修廷勳篤好經籍每下直手不釋卷著詩文集若干卷府志

張對墀字丹颺號仰峰同安人居晉江康熙辛丑進士授大康知縣殫心撫字後以與友人書被逮卒於配所對墀博學多識工時藝詩古文尤奧衍宏深力追古人所著有同江詩文集府志

陳紹芳字德侯號庭思晉江人雍正甲辰進士授肥

鄉令以不能脂韋去職工詩詞古文顏柳書法及

岐黃青囊術府志

李清江字皋侯鍾僑子雍正癸卯舉人為文章拔筆直書頃刻千百言竒趣天溢莫能窮其巧弟清愷字振侯雍正己卯舉人俱有文名李氏家傳

吳振蛟字層三號桃江南安人雍正庚戌進士分發廣東知縣未得缺而卒振蛟德性粹然少有文名肄業鰲峰從巡撫張伯行編纂儒先諸書講身心切已之學及奉檄至粵上官咸重之洪默齋撰誌

李光型字儀卿日焜次子少問學於從兄光地研究



有心得雍正丙午舉於鄉癸丑 詔舉理學朝臣以光型薦 特賜進士擢河南彰德同知有循聲

遷刑部主事充律呂館三禮館纂修以疾告歸著

有崇雅堂文集臺灣私議趨庭錄府志

王士讓字尚卿安溪人安貧勵志篤嗜經學中雍正

壬子副榜舉博學宏詞以薦充三禮義疏館纂修

議叙授湖廣蘄州判所著有六經訓解同榜王元

芳字鼎汝工詩文卓然名家與士讓同舉詞科府志

洪科捷字成仲號默齋南安人性孝友且篤於宗族

嘗葺先墓建宗祠考朱子家禮訂定規條以教族

人當丙午夏泉郡穀價驟昂科捷告於積粟者平

糶邑賴存濟尋以舉人司諭浦城惟以振學校興

文教為事自是鄉薦者接踵乾隆己未成進士選

庶吉士即告養歸奉親之暇益以敦倫潛學訓子

弟鄉里咸服其教為文簡古詩尤工雅年七十三

卒子世澤乾隆丁巳補試詞科入翰林授檢討學

尤淵遠節家傳

出科聯字乾甫惠安人乾隆戊午鄉薦第一己未進

士入翰林郎中扃戶讀書絕不事投謁詩文為時

賢推重府志



漳州府

宋

吳桓字孟文龍溪人元豐進士熙寧間陳三要三術指切時務官至朝散郎攻古文詞有文稿及古律詩百篇傳於世府志

李則字康成龍溪人試太學不得志浩然東歸教授生徒如楊汝南李恂輩皆出其門累薦鄉書紹興間以特科授桂嶺簿攝富川令調德化所至有惠政則學得之程蘇二家有文集教人以仁義為本

道南源委

鄭公顯字隱之龍溪人初以周禮魁鄉書又以詞賦

預薦登乾道丙戌第調富沙戶曹獻時事十論宰同安縣有惠政進權刑部郎官兼權直學士院遇慶會聖節宰臣率百僚拜表就公顯索文援筆立成甚工歷官至中奉大夫公顯為文切當有法度尤長於儷語廟堂表制多出其手有文集十卷時事論十篇及語錄縣志

鄭公敏字明之龍溪人乾道己丑登第歷福清簿有政聲以薦調古田教官理學見重於時著文集語

錄傳世

道南源委



元

王吉才龍溪人篤志古學尤明典禮郡守延為弟子師後為泉州學政親歿哀慕痛毀雖老年不異孺子平居斂容未嘗見疾言怒色學者稱益齋先生

道南源委

明

鄭深道名文孚以字行龍溪人洪武初領鄉薦授程鄉教諭遷寧波教授屢應聘典順天湖廣江西廣東試陞司經局校書入侍經筵讀書制詞以學問老成操履清真褒美之年七十致仕徜徉雲水間

著有存養輯畧樓遲集

府志

黃文史字廷實長泰人少穎悟博極羣書洪武中應試南畿作五經題有司以違式取旨太祖讀其天下一家論大異之御批寘第一免會試授刑部主事以事忤旨貶江西推官為屬官所陷謫戍大同生平著述甚富惜軼不傳

府志

陳鳴球字舜夫詔安人性至孝家貧力學嘗與湛甘泉論體認工夫謂工夫無處不貫然下手處不可不知甘泉歎服又與薛中離講明良知之旨證吾心之無二鳴球明於理學而於天文陰符諸書尤



精曉所著有道心圖體認要解欽齊集外陣圖解

府志

邱原高漳浦人磊落不羈聞羅洪先講學江西徒步從之刻志苦思有悟而歸語人口吾昔憑氣今憑理昔信理今信心然後乃知學之能變化氣質也

縣志

林魁字廷元龍溪人宏治進士自幼博聞強記落筆多奇旣釋褐益肆力墳典授戶部郎西僧大來法主奪民田四百頃魁疏其不法田竟歸民歷官廣東叅政乞休歸闢草堂於白石村自號白石乞言

問字者門無虛日著有白石稿歸田錄

縣志

潘鳴時字徵平海澄人家貧就外傅樵採以資學業

出遊吳會謁王畿講學而歸益聚徒討論於本里行鄉約積義倉練鄉兵以防不測會五寨草寇發以所練鄉兵平之講徒日衆由恩貢判信陽州以拂當道罷著有讀易偶見語錄等編時同郡施仁字近甫博洽善屬文高則賢善講經周一陽以名節著與鳴時潘桂芳號稱五賢閩士負笈至者無慮數百人

府志

戴廷槐字元植長泰人束髮修古於書無所不窺隆



慶二年應恩貢入南雍姜公為大司成廷槐與始  
 蘓張勿于齊名姜嘗云用賦張也升堂小戴入室  
 矣一時詞人盡傾以母老捧檄為遂安尹用經術  
 飾吏治因忤當道罷歸著有就正文畧製錦堂集  
 樵談藪易學舉隅革節卮言府志

林纘振字公悅漳浦人少應試督學周宏祖閱其卷  
 無草稿而字復端楷若夙構者心疑之面試入闕  
 三道論頃刻立就周歎為奇才置第一登萬歷進  
 士授工部主事司節恤庫中貴人偽傳造象冰取  
 庫金萬計纘振抗聲曰取庫金不下大司農而以

一貴人傳旨庸知非詐乎中貴人語塞而去著有

海雲館集府志

劉庭蘭字國徵漳浦人賦才雋穎攻古文詞發閩解  
 與兩都魏允中顧憲成稱鼎立庚辰同第南宮以  
 氣節相慕值允中上疏忤旨責判陳州卽以書請  
 於許國語殊懇激都人壯之未幾卒於家少與伯  
 兄庭芥庭蕙自相師友稱為三劉縣志

黃以陞字孝翼龍溪人崇正間舉孝廉以母老不就  
 遍歷天下名區多所題咏有七州詩集與同里黃  
 道周張燮稱金石交歷知寧波府歸著述極富今



存麗典新聲及蟬窠集縣志

林子雲字質夫漳浦人潛心理學躬行實體融州教

授著易說十卷道南源委

國朝

陳箴字于寶龍溪人順治中恩貢歷平和邵武建寧

連城教諭所至有聲巡撫張伯行禮重之詩有中

晚唐風格著晚簾詩文集與同時洪理順齊名縣志

蔡璧字君宏漳浦人宗禹曾孫康熙壬子拔貢文名

噪成均四明陳汝咸宰漳浦嘗稱為今之黃叔度

事親至孝丙辰授羅源博士躬為文以課士巡撫

張伯行廉其名延至三山先後主龍峰共學兩

院九郡士多稟學焉生平教人在篤於倫理嚴於

義利不以空談性命為高子世遠自有傳府志

李基益字時行海澄人康熙甲子舉人九歲善屬文

解聲律遂以詩名後司鐸永定尋乞休日以著述

為事嘗鏡古今之得失傷事物之盛衰作史論感

鄉俗之偷憂生民之蹙作閩漳詩思微言之將絕

念末學之傾頽作心宗其餘喜怒哀樂悉寄之詩

著有易經解心宗諸集府志

葉先登字岸伯長泰人幼警敏康熙壬辰成進士授



翰林檢討為涼州道轉冀南左遷別駕歸性好學  
著有易經解餘猶手自抄錄有木天草傲帚集

縣志

鄭子江字民仲龍溪人篤志讀書屏絕人事詩古文  
詞皆工與鄭亦鄒齊名時稱二鄭康熙庚子舉人

著沙村集

縣志

陳祖虞字子篤漳浦人年未三十棄舉子業務為聖

賢之學嘗註釋離騷左傳及哀江南賦著葛亭艸

二集

縣志

王道字直夫漳浦人博學工吟咏少以詩受知於學

使沈涵名日起北遊京師宗伯吳文恪公士玉甚

器重之道自諸生以至筮仕每有餘暇輒手一卷

不輟所為詩從近體入更尋味於古風樂府沉鬱

雅健氣味淵蔚俱不懈而及於古著有詩集

抹二  
希堂

集

戴侯焜字仲江工古文尤精史學綜括羣書作史貫

二十一卷康熙丁酉副榜雍正乙卯舉于鄉年七

十矣乾隆丙辰授國子監學正

縣志

莊元字步沂龍溪人少篤學任龍巖學正尋調鳳山

修學官輯郡志乾隆甲戌成進士授庶吉士著春

齋詩文集

縣志



鄭誠中字葦齋龍溪人歲貢生內行純潔尤以文豪於鄉與鄭亦鄒吳鐘戴盼諸名流服襄駮駕狎主齊盟子蒲乾隆甲戌進士

縣志

延平府

晉

廖安將樂人年十歲讀易春秋二經作文如注尤以

詩名

府志

廖衡順昌人性警敏六歲能屬文縣尉催租見之命吟雨中山茶有淚多陳后愁離殿浴出楊妃困倚欄句尉大奇之名聞於郡郡守檄縣以禮遣試以

詩立就既冠赴鄉舉主司得其文寘第二守者私易之自是絕意功名終老林壑

閩書

元

蕭山沙縣人舉端平二年特科仕長溪縣丞性穎敏於書無不讀究理精奧著有讀書傳論語講說讀

易管見

道南源委

明

黃起莘南平人由歲薦司訓莆田所拔皆知名問奇者雲集遷太寧教諭歸家居淡素嘗著書經講義四書講義詩文集

縣志



盧兆字吉夫順昌人博覽羣書詩極華贍以選貢司  
訓分宜庚子應鄉試不售遂棄官歸開詩禮二館  
專以誘掖後學為事士之及門者多成令器府志  
黃文梯沙縣人學問洽博善古文詞工草書嘉靖庚  
子舉人令餘干調保昌所至有惠政致仕歸談經  
啓迪有益後學最多

樂文解沙縣人學務窮理時羅洪先解心性學文解  
往從之羅欣然曰吾老友也嘗以四勿之語相質  
羅曰致力於心心存於事物未接之先如此克已  
方有着落此須持行自見未可得之口說也文解

服膺以行漸有造詣擢鳳陽教諭與南海歐大任  
同徵修實錄又令編輯薛瑄語錄後調雷州謝病  
歸著有一沙文集詩集縣志

盧應瑜字叔忠順昌人隆慶丁卯舉人知遂溪縣遷  
潮州同知治河有功掛冠歸養著書闡明格致一  
貫中和夜氣之旨道南源委

余履信字順卿南平人有聲黌序萬歷辛卯中應天  
副車歸叅楊羅李朱四先生宗旨四方之士歸焉

府志

廖鐔將樂人幼機警敏悟性嗜博洽弱冠補弟子員



不屑屑於帖括著史論二部為詩四萬三千首名  
檄攬集備唐諸家體戊子為賊所害

縣志

國朝

毛章業南平人性醇厚而肆力於學執筆為文矯然  
流俗之外由諸生貢入成均一鄉稱其孝友凡諸  
兄之食飲服御與子弟之婚娶誦讀皆身任焉著

有蔚廬詩文集

縣志

福建續志卷五十四終



Vertical text on the right edge of the page, likely bleed-through from the reverse side. The text is partially obscured and difficult to read, but appears to be organized in a list or table format with multiple columns.



